

تَوْكِيَا  
نَاصِلِيَا يَلَا شَيْئَكَ

قائمه معاهده سندن صوك فلا كتمزه قدر شرق مسئله سی

محرری :

پارس دارالفنونی معلم لرندن

پول هوری

طابع و ناشری

ابراهیم حلمی

در سعادت

کتابخانه اسلام و عسکری

۴۶ — باب عالی جاده سی — ۴۶

۱۳۲۹

Handwritten text in Arabic script, possibly a title or header, located at the top left of the page.

Main body of handwritten text in Arabic script, centered on the page. The text is faint and appears to be a single line or a short paragraph.

تَوَكُّيَا  
نَاصِلًا يَا لَيْلَتَيْكَ

قاینارجه معاهده سندن صوك فلا كتمزه قدر شرق مسئله سی

محرری :

پارس دارالفنونی معلم نندن

پول هوری

طابع و ناشری

ابراهیم حلمی

در سعادت

کتابخانه اسلام و عسکری

۴۶ — باب عالی جاده سی — ۴۶

۱۳۲۹



---

کتابخانه اسلام و عسکری - تجار زاده ابراهیم حلمی

۴۶ باب عالی جاده سی ۴۶

---

## تورکيا ناصل پايلاشيلدى ؟

تورکيانك پايلاشيلماسى شرق مسئله سنك اساسيدر. « بالقان حكومتلرينك صوك تشبثلى اوزرينه بومسئله تکرار موضوع بحث اولمشدر . دول مذکور طرفدن اجرا اولونان حرب ، روم ايلينك يگیدن پايلاشيلماسنه نتيجه ويرمش ، وبومسئله يه دول معظمه ديپلوماسيسى ده مداخله ايله مشدر . شمدى ، مسئله نك صوك صفحه سنى واضحا آ کلامق ايجاب ايدر . فقط بوضفحه ، بر تکرردن عبارت اولديغى کي فاعللرى ده مجهولز دکلدر . يکر منجى عصر ، بوفاعللرک ينه عين مسئله قارشيسنده اخذ موقع ايتدکلرني کورمش ، وبو وضعیت - مذکور حكومتلرک منافع اساسيه لرينه کوره - هيچ ديكشمه مشدر . بوسببه مبنى شرق مسئله سنك حلنده هر حكومتك عنغوى برخط حرکتى واردرکه صوك بالقان مسئله سنده ده بونقطه يى نظر اعتباره المامق قابل دکلدر . بوندن باشقه ، هر حكومتك منافع اساسيه سى دائمى ، وموضوع بحث ايديلن مسئله لرده هيئت عموميه سى اعتباريله ينه بربرينه مشابه



اولق حسييله ، بوسايه ده حصوله كلن وحدت ، تسلسل ووضوح احوال حاضره يي صوڭ درجه واضح برشكله قويمقده در . ايشته بوتسلسلي كوسترمك و بوكون افكار عموميه يي هيچانه كتين بر مسئله يي تنوير ايتمك ايچون شو اوافق كتاب وجوده كتيرلمشدر . كتابده عالمانه مطالعه لردن توقي ايدلمشدر ، وقوعات حربه يالكلز نتيجه لر يي ايضاح ايچون تكرار اولونمشدر . حكومتلر ، كنديلر يي اداره ايدن ذواتك اسمليله دكل ، تمثيل ايله دكلري قومك اسمي ايله كوسترلمش وبوسايه ده حكومات مذكوره يي تحريك ايدن منافعك اليوم باقي اولديغي آچيق بر صورتده آكلاتيلمشدر »

\* \* \*  
 مؤلف اثر ، پارس دارالفنوني معلملردن پول هوري ، شرق مسئله سنه يعني توركيه نك پايلاشمانه دائر يازديغي اترك مقدمه سنده شو مختصر مطالعاتده بولونيور . پول هوري نك بو اثر يي بز عثمانيلر ايچون غايت مهمدر . بوسبیدن هيچ بر تعبير يي دكيشدير مهن عينا ترجمه ايدنيورز . بو اثر ، اول شرق مسئله سنك ساده وواضح بر خلاصه سيدر . ثانياً باشمزه كلن فلاكتلرك سياسي منشالريني ، عثمانلي ايمپراطورلغني تقسيمه قرار ويرن دولتلرك طرز حركت لر يي ، آرملرنده كي احتراصات و رقابتلرك اساسني كوسترر بر رهبردر . بزم ايچون بو اثر دن ايديله جك استفاده ، وطنمزه كوز ديكن دولتلرك تمايل لر يي بيلمك ، او كا كوره آدم اولمانك ، مدني اوروپاده ياشاياييله جك فكر و عرفان

اكتساب ایلنه نك چاره سنه باقمقدر . یوقسه ، امین اولمالی یزکه ،  
حیات سیاسیة و اجتماعیه مزده بوتذبذب ، دماغلریمزده بوجهالت  
باقی قالاجق اولورسه ، روم ایلینك باشنه کلن فلاکت عینیه  
آناطولی یهده انتقال ایده جکدر . چونکه عین احتراصات ، آناطولی  
حقندهده جاریدر .





## نیچون بر شرق مسئلہ سی موجود ؟

بر شرق مسئلہ سی موجود ؛ چونکہ اورتا آسیادن کلن تورکلر، موغولر قرون وسطادن بری شرقی اوروپا یہ استیلا ایتشلر، اورالردہ خاکانہ یرلشمشلردر . اهل صلیک موقیتسزلکی ، مختلف اوروپا حکومتلرینک داخلی تشکیلاتندہ دورتوقفک ظہوری ، قسطنطنیہدہ کی روم ایمپراطورلغنک دوچار اولدینی فترت ، اون دردنچی عصر دن صوکر ا تورکلرک غربہ طوغرو مظفرانہ یورویشلرینی قولایلاشدیرمشدی . ۱۳۸۹ ( ۷۹۱ھ ) دہ قوصوہ میدان محاربہ سندن صوکر ا صرب قراللغنک سقوطی ؛ ۱۴۵۳ ( ۸۵۷ھ ) دہ قسطنطنیہ نک ضبطی ایلہ روم ایمپراطورلغنک سقوطی ؛ ۱۵۲۹ ( ۹۳۲ھ ) دہ بوداپشتہ نک ضبطی ایلہ برابر ماجار قراللغنک سقوطی ؛ ایشتہ بونلر ، بومظفرانہ یورویشک باشلیجہ مرحلہ لرینی تشکیل ایلہ مشدی . حتی اون آلتنجی واون یدنجی عصر لردہ ، ہابسبورغلرک پایتختی ، ( ویانہ ) بیلہ ، برچوق



دفعه لر تورکلرک هجوملرینه معروض اولمشدی . فقط تورکلرک مساعیسی ( آلب ) مانه لرینی آشامامش ، ماجارستان آذربزمان سوکرا آلرندن چیقمشدی . اون یدنجی عصرک نهایتده آوستریا اردولری ماجارستانده کی ماجارلری اسلام حاکمیتدن چیقاریور ، ویانه حکومتک جرمن وصایتی آلتنه صوقیوردی (۱) .

ایشته بو ، تورکلر ایچون کری چکیلمه نک ، آوستریالیلر ایچون شرقه طوغری ایلریله مه نک ( درانغ ناخ عوستن ) ک ، بوکون بالضروره آوستریا سیاستک اساسنی تشکیل ایدن فکر مدیرک ، باشلانغی ایدی .

شرق مسئله سنک تاریخی ده ، تورکلرک اوروپادن چکیلمه لرینک تاریخیدر . بو چکیلمه ده ضروری ایدی ؛ چونکه تورکلر بورالرده اساسلی هیچ برشی تأسیس ایده مه مشاردی . سوک حادثه لرده کوستردی که ، تورکلرک وطنرور لکلری مسلسل و متوالی بر فعالیت شکلنده بر حکومت تشکیلاتی وجوده کتیرمه که قادر دکل . حتی شوده دنیلدی : «تورکلر دوت عصر وحتى ده ازیاده برمدت اوروپاده چادر قورمشلردر» . فی الحقیقه تورکلر بوراده یالکز فاتحک و کاشفلکدن باشقه برشی یایمق ایسته مه مشلر ویا یایامامشلردر .

تورکلرک ، پیهلوتی ایچون معزز ، برچوق اوصافی اولایلیر . فقط هر حالده کندیلرنده تشکیلات حسی مفقوددر . ایشه بونک

ايچون تاريخ - حتى كندی تاريخلری بيله - كندیلرني اتهم ایدیور. تورکله، مالیه سی، اردوسی و اداره سیله منتظم برحکومت تأسیس ایدمه مشلردر. شرقه خاص بر عطالت، اسلامله خاص بر قوته متابعتله، سلطانلرک، سردار اعظملرک اداره مطلقه سنی نهایت بر دره بکلک چته سی حاله کتیر مشلردر. بناء علیه دها اون سکزنجی عصر دن اعتباراً تورک ایمپراطورلنی جزء جزء آیرلمايه باشلامشدی. یکیچری اردوسی انضباطسز بر میلیدن باشقه برشی دکلدی. واقعا محمود ثانی ۱۸۲۶ دن سوکرابونک یرینه اورو و پاطرزنده - ۱۸۸۰ ده آلمان سیستمنده - بر اردو اقامه سنه موفق اولدی؛ فقط انضباطسزلق تورک ضابطلرینک طبایع میزه سندن اولمق اوزره باقی قالدی. بودورده ولایتلرک اداره سی پادشاهک حکم کیفیسنه تابع بر نوع زادگانک، پاشالرک عهده سنده ایدی. پادشاه، خلقک ضررینه اولمق اوزره ویرکی طوپلایوردی. سوکرا، حکومتک اوجکدن کسدرلمش حاصلاتی، قونتروله تابع مصارفاتی یوقدی. مصارفات، پادشاهک کیفه ویا اطرافنده کیلرک احتیاجاتنه صرف اولونور، نادرآ امور حکومته صرف ایدیلیدی. حکومتده، مملکتدن پاره چکهرک بونقصانی تلافی ایدردی. واردات کاملاً بو صورتله چکیلن پاره دن عبارت بولونوردی. پاره چکمک اصولی ده، مأمورلردن تکالیف، اراضی صاحب لردن ویرکی آلمق، عسکرلر واسطه سیله غارت ایلکدی.

ایشته تورکلر طرفدن اشغال اولونان مملکتلر اهالیسی بویله بر اداره یه تابع اولمشلردی . خرسیتیانلر بر نوع خراج ویره رک مسامحه کوررلردی ؛ فقط یینه رعایا اولارق قالیرلر ، ضابط ویا مأمور موقعنه اصلا نائل اولامازلردی . تورکلر ، خرسیتیانلری تمثیله غیر مقتدر بولوندقلری جهته بو اقوامک لسانلرینه ، عادتلرینه ، قیافتلرینه ، راهبلیرینه ، کوی رئیسلیرینه - حاصلی ملیتلری مصون بر صورتده تأسیس وتأمین ایدن هر شیئه رعایت ایدرلر ، فقط شرقلیله خاص حرص و وحشت اسلاملق تعصبی ایله بسبتون شدت کسب ایدرک دائمًا عداوتلر صاقلارلر ، عصیانلر حاضر لارلردی .

ایشته اون طقوزنجی ویکرمنجی عصرده شرق مسئله سنک سلسله سنی تشکیل ایدن ، بومتوالی عصیانلردر . بالقانلرده یاشایان درت قوم ، کندیسنده امید موفقیت حسی طویدقجه ، تورکلرک تضییقی اوزرلرینه دها زیاده آغیر کلدکجه ، بر برینی متعاقب ، حریتلری ایچون آیاقلانمشلردر : اولا جنوب روملری ایله غرب صربلری ، سوکرا طونه رومه نلری ایله شرق بلغارلری ... بوقوملر ، آلمانیا ایله ایتالیا نک موجودیتی تشکیل ایدن و هر ملتک بر حکومت تشکیل اتمسی اساسنه مستد بولونان ملیتلر قاعده سنی تطبیق ایتدیرمکه موفق اولمشلردر .

شرق مسئله سی تورکیه نک داخلی بر مسئله سی عد اولوندینی

تقدیرده ، بر برینی متعاقب (۱۸۲۰-۱۸۳۰) ، صرب (۱۸۰۴-۳۰



۱۸۷۵ - ۷۸)، رومانيا (۱۸۵۶ - ۷۸) وبلغار (۱۸۷۸ - ۱۹۰۸) حکومتلرينك تشکلی بو مسئله نك دوت اساسلی صفحه سنی تشکيل ايدر .

فقط بومسئله ده ، هيپات ! بالخاصه بر اوروپا مسئله سيدر . دول معظمه نك كافه سی بوداخلی ائتلافله کندی منفعتلرينه ويا احتراصلرينه کوره مداخله ايتمشلردر . بو احتراصلر هيچ بر زمان سونمه مشدر؛ بومنافع حياتيه ايسه تطبيقی غایت قولای، غنغوی بر مسلکدن عبارتدر .

روسيه حكومتی ، بويوك پترو زماندن بری ، دائماً آچيق دكز سياستنی تعقيب ايله مشدر . بالطق دكزنده اولديغی کبی ، قره دكزده ده اولا بر پنجره ، صوكررا بر جبهه ايسته مشدی . فقط بالطق ايله قره دكز قابالی دكزلردن ایدی . روسيه ایچون بحر سفیده بر قابو لازمدی . بو قابو نیچون باب عالی - استانبول اولماسین ؟

تورکيه ايشلرينه مداخله ایچون روسيه نك پك مکمل بهانه لری واردی : دین ! وقتيله پولونیا ده اولديغی کبی ، شمدی ده ذات شاهانه نك ۱۷۷۱ ده تصدیق ایلدیکی حق تمشیلدن استفاده ايدرك دولت عثمانیه ده کی روم اورتودوقس اهالی یی کمال شدتله « حمايه ايتمک » کافی ایدی . بالقان خرستیانلرندن قسم اعظمی ايله اشتراك جنسی ، همان كافه سی ايله اشتراك دینی ، بامعا هده تصدیق ایدلمش اولان بو حقوق ، روسيه یه معنوی بر

نفوذ، رسمی بروضعیت حمایتکارانه بخش ایدیوردی؛ روسیه بونفوذینی بر چوق زمانلر، بوغازلر حقدده کی احتراصکارانه آمالنه اساس اتخاذا ایله مشدی .

فقط بر دولت واردی که، شرقی بحر سفیدده وقوعه کله جک موازنه نك هر نه صورتله اولورسه اولسون تبدلندن پك زیاده اندیشه ناك اولاجقدی؛ اوده انکلتزه ایدی. انکلتزه، هندستانه حاکم اولدینی کبی، هندستان طریقنی طومایه ده صوک درجه اهمیت ویریوردی. بوکون ناصلکه بغداد شمندو فرینه مانع اولیور و روسیه نك ایرانه دخولنی توقیف ایلورسه، اون طقوزنجی عصرده و اون سکزنجی عصرک اوخرندن اعتبار آده، روسیه نك تورکیه ده کی نفوذینه مانع اولیوردی. بونفوذنه، زمان فضله لاشیرسه، انکلتزه نك هندستان یولنی محافظه ایچون روسیه نك قارشینسه دیکلیدیکی کورولیوردی .

صوکرا، فرانسه واردی؛ فرانسه ده بحر سفید دولترلندن بری ایدی. روسیه شرقده ناصلکه اورتودوقسلری حمایه ایدیورسه، فرانسه ده قاتولیکلری محافظه ایدیور، اوته دنبری ده ایتمکده بولونیوردی. بوسیدن دینی بر رقابت فرانسه یی قریم حربی کبی کفتلی بر حربه صوقمشدی .

فقط تورک ایمراطورلغنه، روسیه دن صوکرا، فوق العاده علاقه دار اولان حکومت، آوستریا ایدی. آوستریا حکومتی بالقان اسلاولرندن، آنلرک ملیت قاعده لرندن او درجه

خوشلانمازدی؛ چونکه آوستریا حکومتک موجودیتی بيله بو اسلاولرک ازیله سی و بو قاعده نك طانیلماسی اساسنه مستند ایدی. فقط بو خصوصده خوشلانمق مسئله سی موضوع بحث اولاماز؛ بین الملل خصوصاتده منفعتدن باشقه منطق یوقدر. بناءً علیه آوستریا، احوالك تأثیری آلتنده، فقط بر چوق بصیرتسزلك دورلری کچیرد کدن سو کرا، منفعتک کنديسی شرقه طوغرو سوق ایتدیکنک فرقه وارمشدی؛ اوزمان (سلانیک) آوستریانک هدفنی تشکیل ایله مشدی. آوستریانک (سلانیک)ی آله ایتمسی ایچون ایکی اصول واردی: یا روسیه نك استانبوله طوغرو حرکاتنه مانع اولارق تورکیه بی روسیه یه قارشى مدافعه ایتک که، - اوزمان کنديسنه خرستیانلرله مسکون برتورک ایالتی تأمین ایله مک - بو اصول اون سکزنجی عصرده وبرلین قونفره سنده کمال موفقیتله تطبیق ایدلمشدی - و یا خود تورک ایمپراطورلغنی ضعیف دوشورمک ایچون روسیه ایله او یوشمق، اوزمانده ممکن اولدیغی قدر واسع بر منطقه نفوذی منازع فیه برامق - که بو اصولده ایکنجی ژوزف ایله قاتهرین طرفندن تأسیس ایدلمش و فنا بر اصولده دکلدی. خلاصه ایکی سیاست که عامیانه ایکی تعبیر ایله خلاصه ایديله بیلیردی: بری روس دشمنلغی: (سن چکیل، بن کله یم)؛ اوبری ده ائتلاف سیاستی: (ایکی یه بولوشمک) دن عبارتدی. فقط بوتون مقصد، دائماً تورکیه نك تقسیمى ایدی. یالکز آ کلاشلماسی لازم برشی وارسه



اوده آستریانك بوتقسیمی روسیه ایله می، یوقسه آوستریا ایله می  
یاپاجنی ایدی .

ایشته بوصورتله ، دولت عثمانیه نك بحر سفید شرقده کی  
موجودیتی و خرسیتیان اقوام اوزرنده کی حاکمیتی اونسکزنجی  
عصرک اواخرندن اعتباراً ایکی ترتیب مسئله تولید ایله مشدی :  
بری بالقان خرسیتیانلری ایچون ملی برم مسئله؛ دیکری ده بوغازلری  
آله کچیرمکده علاقہ‌سی اولان دولتر ایچون بین الملل برم مسئله .  
بو مسئله لرك هر ایکسندده اک برنجی رولی روسیه ایفا  
ایدیوردی . چونکه روسیه اسلاو و اورتودوقس ایدی ؛  
چونکه روسیه استانبولی هدف اتخاذا ایدیوردی . بو ایکی  
مسئله ۱۷۷۰ دن بری صره ایله موضوع بحث اولدی ، بو  
مسئله لرك انکشافی ده شرق مسئله‌سی تشکیل ایله دی .

## تورکيه نك تهديد ايدلمه سي

۱۷۷۰ده روسلرک (اسماعيل) و (چشمه) ده مضاعف بر  
ظفر اجراز ايتملري اوزرينه شرق مسئله سي اچيلمشدي .  
فقط تورکلر ايچون اصل تهلكه ، اوسترياليلردن كله چك  
ظن ايدلمشدي . اوستريا حكومتی ، تورکلردن يالكز ماجارستاني  
آلقه قباغت ايمه مش ، فتوحاتي (بلغراد) ه قدر ايلريله تمشدي .  
۱۷۱۸ ده افلاقده كي اولاحلر ، بوسنه و صربستانك بوتون  
صربلري اوستريا اداره سنه كچمشدي . آرتق آشاغی طونه يوللري ،  
سلانيك قاپوسي اچيلمشدي . فقط هابسبورغ خاندانی بونلري  
حفظ ايمه نك يولنی بيله مه مشدي .

بو حالدن اك زياده روسيه استفاده ايتمشدي . ۱۷۶۸ده اوافق  
بر حدود جاده سي دولت عليه - روسيه حربنه سيبيت ويرمش ،  
روسلرک مظفرتي اينك دفعه اولمق اوزره تورکلرک موجوديتي

تهلکه یه القا ایله مشدی . روس اردوسی طونده ده کی رومهن ایالتلری اشغال ایدیوردی . روس دونانماسی (چشمه) لیمانده تورک دونانماسی یاقاجق ، دها صوکر ا استانبولی آلمقدن باشقه برشی قالمایا جقدی (۱۷۷۰) .

روسلرک آشغی طونده ده بولونمالری ، استانبولک روس حاکمیتته معروض قالماسی ، آوستریایی اندیشه ناک ایده جک بر وضعیتدی . بونک اوزرینه ماری تهره ز درحال روسیه یه قارشی تورکلره اویوشمش ، روسلره (قاینارجه) معاهده سنی عقد ایتدیرمشدی . آرتق روسیه نك فتوحاتندن اثر قالمامشدی . بوغازلر مسئله سی هیچ موضوع بحث اولمایا جقدی ؛ آوستریا بوندن پک ممنون اولمشدی . فقط روسیه نك استقبالی ده ، روم کلیساسنک ویارومهن ایالتلرده کی خرستیان اهلینک حق تمثیلی حائر اولق صورتیله وقایه ایدیوردی . بوندن بویله روسیه ، ملیت مسائلنده دولت عثمانیه ایشلرینه مداخله ایده جکدی . آوستریا یه کلنجه ، اوده دوستانه توسطنک مکافاتنی تورکیه دن آلیوردی . رومه ندرله مسکون اولان بوقووینانک الحاقی طونه دلتاسنه طوغرو آوستریانک برنجی مرحله سنی تشکیل ایدیوردی . ایشته بو صورتله آوستریا حکومتی عدم مداخله کبی روسیه یه ضد بر سیاست تعقیب ایتدکدن صوکر ا ، عکسی بر سیاستدن ، تورکیه ده مشترکاً بر مداخله اجرایی ایچون روسیه ایله ائتلاف یعنی (مقاسمه) سیاستدن ایده جکی استفاده بی دوشونیوردی .



ايکنجى ژوزف ، قاتهرين ايله اويوشارق بوکا قرار ويردى .  
 بوسورتله ( بويوک روم پروژەسى ) دنيلن بلان ، دولت عثمانیه نك  
 اورتادن قالديرماسيله شرق مسئله سنى حل ايدييور ، برحمایه  
 طريقى ايله آوستريايى طونه دن بحرسياهه ، روسيه يى ده استانبولدن  
 بحر سفیده ایصال ایلوردی . بو حل پک بسیط ایدی ؛ فقط  
 باشده انکلتره اولمق اوزره ، بوتون اوروپايى اندیشه ناک ایدە جک  
 برماهیتده ایدی . نهایت فرانسه اختلالنک آنسزین ظهوری ،  
 بوتون نظردقتی ، حتی احتراصلری غربه جلب ايله مشدی .  
 روسیه ايله آوستريانک مظفريتلى قطعی برتجریه یه منجر  
 اولامامشدی . تورکیه نك انقراضی ده ابرعصر دن زیاده اوزامش ،  
 تورکیه نك برچوق ایى دوستلى ، قنالى بسبتون تشدید ایدرك آن  
 ممانک اوزامسنه سبب اولاجق خائنه معاونتلرده بولونمشلردی .  
 فقط ، برنجی نيقولانک دیدیکی کبی « آدم ، جدا خسته  
 ایدی . خسته نك ایکی وارثی ايسه ، اوکا يالکزیر آن انتباه بخش  
 ایتک ایچون عرض اندام ایتمشلردی .

## روملرک استخلاصی و صربلرک مختاریتی

فرانسہ انقلابی ایله ایمپراطورلق ، نظر دقتی تورکیه دن چویرتہرک تورکیه یه پک بویوک بر خدمت ایتمشدی . بالخاصہ ویانہ حکومتی خارق العادہ برسہولتله شرق مسائلنه ہیچ اہمیت ویرمہ مشدی . آوستریا حکومتی ، متہرنجک ادارہ سی آلتندہ ، اولا ناپولئونہ ، سوکرا فرانسہ انقلابنک اساسنہ قارشى اسکی ادارہ مطلقہ یه تابع حکومتلرک مجاہدی کسيلمشدی . ۱۸۱۵ دن سوکرا ، آوستریا حکومتی آلمانیاہ حاکم اولمقدن واتفاق عقدی ایله قونفرہ لر واسطہ سیلہ ، قرالارک اقوامہ قارشى بین الملل حرکتی تنظیم ایتمکدن باشقہ برشى دوشونمہ مشدی . آوستریا حکومتی ، ناپولئون مغلوب اولوبدہ ویانہ قونفرہ سی موازنہ قاعدہ سی و متفکرک منافعی نقطہ نظرندن اوروپایى نفوذی آلتنہ آلدینی زمان بیله تورکیه یی تشکیلات عمومیہ خارچندہ براقشدی . چونکہ آوستریا ،

يارم عصر ظرفنده ، شرقه عائد منافعی آلمانیاده کی احتراصاته  
 واوروپاده کی وظائفه فدا ایتمشدی. روسیهده ۱۸۱۲ دن ۱۸۳۰ ه  
 قدر کنديسنه میدانی آچیق بولمش ، کندي نفوذینک ترقیسی  
 نقطه نظرندن دولت عثمانیهده کی خرسیتیانر لهنده حرکت  
 ایده بیلمشدی .

اون طقوزنجی عصر بدایتده شرق مسئله سنک تکرار  
 آچیلدیغنی اظهار ایدن اختلالر باشلادیغنی زمان ، روسیه نك  
 بو نفوذی ، تأثیرینی قطعی بر صورتده کوسترمشدی . بو  
 عصیانر ، روملرک و صربلرک عصیانی ایدی . اوزمان چار  
 روملری سلاح ایله حمایه ایتمش ، صربلره دیپلوماسی ایله یاردمده  
 بولونمش وهر ایکیسنه ده موفقیت تأمین ایله مشدی .

روملر پک چوق دفعه لر تورکلره قارشى عصیان ایتمه  
 تشبث ایله مشلردی؛ فقط بو عصیانلرک باصدیرماسی غایت سریع  
 و غدارانه اولمشدی. ۱۸۲۱ حرکت عمومیه سی الك زیاده روملرک  
 تجارت بحریه سایه سنده قازاندقلری ثروت ، و بو ثروت  
 واسطه سیله اکتساب معرفت ایدرک روم عرقنک شرفلی ماضیسنه  
 ایدیلن وقوف ، و برده بوماضینک اوروپاده حاصل ایتدیکی توجه  
 سایه سنده وقوعه کله بیلمشدی . فقط روملر کندي باشلرینه  
 و یاخود آره لرنده اوتهدن بری اکسیک اولمیان خصوصی  
 معاونتله براقلمش اولسه لردي ، اسلاملرک وحشتی آلتنده ،  
 پادشاهک ذی قدرت والیسی مصر پاشاسنک جنکاور عسکرلری

اوکنده صورت قطیعه ده مغلوب اولورلردی. حتی بوتون یونانستان استیلا اولونمش ، ( آتیه ) بیله ضبط ایدلمشدی . فقط بو ائناده افکار عمومی نك تأثیری ایله اوروپا - انکلتره ، فرانسه و روسیه - ساقز قتل عامندن متأثر اولارق ۱۸۲۷ ده مداخله یه قرار ویرمشلردی .

بو مداخله ، بالطبع صلحچو روانه ایدی ؛ چونکه مداخله ده روسیه ایله انکلتره بر آرده بولونیوردی . انکلتره ، عاصی روملره نه درجه توجه کار اولورسه اولسون ، ینه انلرک دعواسنی سلاح ایله مدافعه یه راضی اولامازدی . فقط بو اوچ دولتک مداخله سی تورکیه نك اصرار و مقاومتنه معروض اولدی . بو مداخله یه استناد اولمق اوزره بر دونانما کوندرلدی . نهایت تورک دونانماسی ایله بوقوه بحریه آرسنده آنسزین ( ناوارین ) محاربه بحریه سی وقوعه کلدی . بو حادثه ، تورکیه نك ده ازیاده اصرار ایتسنه و روسیه نك تورکیه یه اعلان حرب ایله مسنه سببیت ویردی . روسلرک طونه اوتهلرنده احراز ایله دکلری مظفریتلر نهایت ( ادرنه ) نك ضبطی ایله نتیجه لندی ، معاهده صلحیه ده بوراده امضا ایدلدی .

ادرنه معاهده سی عین زمانده روسلرک اراضیجه موجود احتراضلرینی ، روملرک ده ملی مطالباتی یرینه کتیریوردی . شبهه سز ، بومنونیتلر ینه ناتمامدی . روسلر روم ایلیده طونه آغز لرینی آلیورلر ، روملرده کاملاً حریتلرینی استحصال



ايلبورلردى . بوصورتله خلاص اولان روملر كاملاً مستقل بر قراللق تشكيل ايدبورلردى؛ بو قراللق ايسه حياتى روسيه يه مديون بولونيوردى .

بر سنه سوکرا ( ۱۸۳۰ ) روسيه يکي برديپلوماسى موفقيتي ايله نفوذىنى آرتديرييور ، بالقانلرده کي خرستيان اقوامك اذ ذى قدرت حاميسى صفتيله صورت قطعيده اورتايه چيقيوردى . فى الحقيقه بو ائنده صربستانك خراجگذار ، فقط مختارى حائر بر پرسلك صورتنده تشکلى ، روسيه ايجون يکي بر مظفريتدى . صربلر تجارته وطوموز چوبانلغى ايله کچنيرلر ، کندى کنديليرنى اداره ايدرلردى؛ فقط شهرلرنده بولونان يکيچريلرک مظاملى کنديليرنى فوق العاده بزديرمشدى . بو سببدن بلغراد منطقه سنده کي صربلر ، اولا کنديلرينه تعرض ايدن يکيچريلره قارشى عصيان ايتديلر . سوکرا ، سلاحرينى طوبلا تمق ايسته ين سليم ثالث اردوسنه قارشى مظفرانه يوروديلر . فقط قره يورکينک رياستى آلتنده آياقلانان صربلره روسلرک ياردم ايتمى ۱۸۰۶ دن ۱۸۱۳ ه قدر مملکتلرنده حاکم اولمالرينى تأمين ايتدى . روسيه نابولئون ايله مشغول بولونديغى صروده تورکلر بر تعرض رجى اجرا ايلديلر . ايشته اوزمان صربستانده « بر مزار صلح وسکوتى » حاصل اولدى . فقط ۱۸۱۵ ده روسيه سربست قالير قالماز ، بوسفر ( ۱۹۰۳ ده قتل ايديلان قرال آلکساندرک جدى ) ميلوش اوبره نوويچک رياستى آلتنده عصيان تکرار باشلادى .

میلوش، قره یورکی بی اولدیردی. کندیسنک صرب پرنسلیکی ذات شاهانه طرفدن تصدیق اولوندی. ۱۸۳۰ ده روسیه حکومتی کندیسنه صربستانک ارثی پرنسی عنواتی ویردی. یکی حکومتک علامت تابعیتی، بلغرادده بر تورک مفرزه سی بولونماسی و سنوی بر ویرکی اعطاسندن عبارت اولدی.

ایشته بو صورتله بالقانلرده کی خرستیان حکومتلر روسیه یه، بر مخلصه نگاه ایدرکی، باقمایه آلیشمشلردی. روسیه، روملرک و قسماًده صربلرک استقلالنی تأمین ایدرک دولت عثمانیه نك اوتهدن بری ارزوایدیلن انقسامنه موفق اولیور، یکی امللر تولید ایدرک تورکیه داخلنده کندیسنه قیمتدار مشتریلر وجوده کتیریور، بو امللری قوه دن فعله ایصال ایدرک تورکیه نك خلاص اولان خرستیانلرینه معنوی حمایه سنی وضع ایتمک و اسلام تورکیه بی یعنی استانبولی کندی آرزوسنه رام ایله مک ایستیوردی.

بونتایج، انسانیت، عرق و دین قرابتی ایله تطبیقنه لزوم کورولن بر سیاستک ضعف نتایجی ایدی که، بونده منفعت اک شایان احترام حسیات ایله ممزوج بولونیوردی.

## اوروپانك توركيه يي حمايه ايتمسي

روسيه ، ۱۸۳۰ دن صوگرا ، كنديسي ايجون پك زياده موفقيتله نتيجه لهنن بر بسياستي عجاندهن تطبيق ايمه دي ؟ روسلر و صربلردن صوگرا ، شمدي افلاق و بغدادنه كي رومه نلرده اتحاد و استقلاللريني طلب ايدييورلردى . قاينارجه معاهده سي روسيه يي بونلرك طوغرودن طوغرويه حاميسي كي كوسترييوردي . روس اردولرى ، بو اراضيدن اكثر يا كچدكلرى صروده ، هر ايكي پرنسل كده ده سوره كلي بر اداره تاسيس ايله مشلردى . بو اداره موحينجه والى ايله مجلس ، خرستيان زادكاتنى تمثيل ايدييوردي . اويله كورونيوردي كه ، روسيه حكومتى بر رومه ن حكومتك تشكىلنى تسهيل ايتك ايجون اساساً كتساب ايتمش بولونديغى قوتدن استفاده ايتسه كافى ايدي . روسيه ، بر رومه ن حكومتى تشكىل ايتديكى تقديرده ، دولت عثمانيه يه يكي بريول آچاچقدى .

فقط روسیه بوکا یاناشمادی . چار برنجی نيقولا اوروپادن  
 و احرارانه فکرلردن نفرت ایدیوردی . رومه نلرك ملی فرقه سی ،  
 قانون اساسی ایله برابر ، اوروپا طرزنده بر حکومت ارزوسنده  
 بولونیوردی . واقعا رومه نلر روسیه خارجنده وحدت لرنی تأمین  
 ایتشلر ، ۱۸۴۸ دن اعتباراً روس نفوذندن قورتولمشلردی ؛  
 فقط بو دورده برنجی نيقولا ( بکرش ) ده کی احراره قارشی  
 آچقندن آچیغه مخالفتی التزام ایله مشدی . مته ریخك روسیه  
 ایچون یاپدیغی کبی ، چار نيقولاده بین الملل اداره مطلقه  
 مجاهدکننده کی وظیفه سنی روسیه نك منافعه فدا ایله مشدی .  
 چار ، روسلرك شرقده کی متفقلرندن ، کندیسنه خاص  
 بر اصول ایله ، یعنی زور ایله ، دها طوغرودن طوغروه ودها  
 مکمل بر صورتده استفاده ایتک ایتیوردی . چارک ملیت  
 سیاستدن وازکچمه سی ، تورکیه نك انقسام سیاستی تعقیب ایتک  
 ایچوندی . فقط بو سیاستده ، مسئله یی بین الملل بر زمینه  
 قویمقدن باشقه بر شی دکلدی . ایکنجی قاته رینك تجربه لرندن  
 صوکره ، فی الحقیقه مأمول ایدلدیکی اوزره ، چار بو سیاستده  
 انکلتره ، آوستریا و فرانسه نك خصومته معروض اولمشدی .  
 چار اوله ، ادرنه معاهده سندن بری سلطان محمودی تهدید  
 ایدن داخلی برتهلکدن استفاده ایتدی . روسلرك عصیاننه قارشی  
 یارم ایتمش اولان مصر والیسی محمد علی ، بوکا مکافات اولمق  
 اوزره ( سوریه ) بی ایستدی . جواب رد آنجه ، سلاحی ایله



ضبط ايدرك استانبول اوزرينه يورودي. اوروپا عظيم برهيجان  
ايچنده قالدي. چار، شهرى مدافعه ايتك ايچون برقول اردو  
ايله بردونانما كوندردى. بوحمايه نك ضمننده بر شى واردى.  
بوسيدن سلطان محمود انكلتره نك توصيه سى اوزرينه، محمد علي يي  
ممنون ايدرك بوحمايه لزام براقادى. فقط بوحمايه قوتلى  
ايدى؛ ايچابنده اكا استناد ايتك فائده لى اولاجقدى.

سلطان محمود، روسيه نك حمايه سنى سكر سنه مدته  
قبول ايتدى. ۸ تموز ۱۸۳۳ ده روسيه ايله (خنكار اسكله سى)  
معاهده خفيه سنى امضالادى.

بومعاهده نك انكلتره و اوستريانك متيقظ طوران حسدلرينى  
اوياندير اجنى طبيعى ايدى. چونكه معاهده يالكز روسلرك  
توركيه ايشلرينه مداخله سنى تايمين ايتيوردي؛ وقت سفرده  
بوغازلرى ده روسيه نك كيفه براقيوردي. سلطان محمود  
هردرلو مهاجمته قارشى بوغازلرى قاپاميور، بوضورتله قره دكزى  
واسع برروس عسكرى ليمانى حاله كتيرييوردي.

نتيجه ده حمايه منجر اولاييله جك بر معاونت، بوغازلره  
صورت قطعيه ده وضع يدايتك... ايسته اوستريانك وبالخاصه  
انكلتره نك (خنكار اسكله سى) معاهده سندن آكلادقلى بو ايدى؛  
بوسيدن معاهده نك تطبيقه درحال مانع اولمايه چاليشديلر.

محمد علي ذات شاهانه قارشى ۱۸۳۳ ده كى مظفرانه  
سفرينه ۱۸۳۹ ده ايتدار ايدرك استانبولى تهديدده باشلار باشلاماز

ايكى حكومت ، آوستريايابه انكلتره ، روسيه دن اول طاورانارق  
 توركيابي مشتركاً حمايه لرى آلتنه آلماي بوتون اوروپايه تكليف  
 ايتديلر . فرانسه بو ائناده ، بعض عارضى سبيلردن طولايى ،  
 بوتكليفه راضى اوليور ، آز قالسين محمد علي نك اوغورينه  
 محاربه يه كيريشيوردي . فقط ۱۸۴۰ ده لوندرده عقد ايديلن  
 معاهده نك اهميتى آشكار ايدى . آوستريايابه انكلتره ، روسيه نك  
 بو حمايه مسؤوليتنى بالذات درعهده ايمه مسى ايچون توركيابي  
 حمايه اوروپايى مجبور ايدى يورلردى . اوزمان افكار عموميه ،  
 محمد علي نك مغلوبيتنى فرانسه نك بر موفقيت سزلكى تلقى ايتمشدى ؛  
 فقط بو ، هرشيدن اول روسيه يه قارشى برضبه ايدى . مع مافيه  
 برسنه صوكر ا انكلتره حكومتى بوغازلر معاهده سنى عقد  
 ايتديره رك موفقيتنى اكمال ايتدى . بو معاهده موجبجه چاناق  
 قلعه بوغازى ايله قره دكز بوغازى ، بلااستنا بوتون سفان  
 حربيه يه مسدود بولوناجق ، بو صورتله روسلرك قره دكز  
 دوناماسى معطل قالاچقدى .

انكلتره بو صورتله ، عنعنوى سياستنى تعقيب ايدرك ، خنكار  
 اسكله سى معاهده سنك ايكى اساسلى ماده سنى صفره تزييل ايدى يوردى .  
 چار ، انكلتره يى ده كندى احتراصاتنه تشريك ايدرك بو اصول  
 تحتده مخالفته قارشى مظفر چيقمايى دوشوندى . ايكنجى  
 قاهرينك وقتيله آوستريايه تكليف ايتديكى كى ، انكلتره يه  
 توركيابي آچيقدن آچيفه پايلاشمايى تكليف ايتدى . خنكار

اسکله سی معاهده سنک تطیقاتنه کیریشدی . روسیه ۱۸۵۳ ده پرنس منچقوفی سفیر کوندرمش ، بوسفارت موفقیته نتیجه لندیکی تقدیرده تورکیه ده دینی حمایه امتیازینی توسیع ایدرک ممالک عثمانیه ده دائما برحق مداخله تأمین ایتمک امیدنده بولونمشدی . انکلتره حکومتی ، فرانسه نك یاردیمی ایله ، تکرار بو استیلا - کارانه سیاستک اوکنه دیکیلدی . اوچنجی ناپولئون ایله قاتولیکلر بحر سفید موازنه سنی اورتودوقس چاره قارشى کمال مسرتله مدافعه یه قویولدیلر .

قریم سفری ، روسلرک استانبول حقنده کی امللرینه ، تورکیه ، انکلتره و فرانسه نك بر جوابی ایدی . بو حربده ، « معنوی امنیتلر » وجوده کتیرمک ایچون اشغال ایدیلن طونه پرنسلکلرندن روس اردوسنی قوغمقله اکتفا ایدیله بیلیردی ؛ فقط انکلتره ، روسلرک قره دکز دونانماسنی صورت قطعیه ده محو ایتمک ایستیوردی . بوسیدن حربی قریم ساحه سنه تشمیل ایتمشدی . بناء علیه روسلرک بویوک ترسانه سی ، سیواستپول ، فرانسلرک مساعیسی سایه سنده ، انکلتره منافعه اولمق اوزره تخریب ایدلدی .

بو حرب ، اوزون و قانلی اولدی . نتایجی ایسه ۱۸۵۶ ده پارس قونغرهنده قید ایدلدی . بو معاهده چار نیکولانک پرورده ایلدیکی احتراملرک موفقیتمسز لکنی و انکلتره نك مظفریتنی اعلان ایدیوردی . پارس معاهده سی موجبجه ، قره دکز بیطرف اولاجق ، بوراده روسیه دونانما بولوندیرمیه جقدی . بو صورتله

توركيه نك امنيتى تا مین ايديليور ، بوغازلر مسئله سنك اهميتى  
 آزالتيديوردى . فقط بالخاصه دولت عثمانيه نك تماميت ملكيه سى  
 اعلان ايديله رك بوندىن بويله روسلرك توزكيه يه مداخله سى عديم  
 الامكان برحاله كتيريديور : « توركيه نك تماميت ملكيه سنه تجاوز  
 تلقى ايديله جك هر حركت ، اوروپانك منافعه متعلق بر مسئله  
 عد اولوناجنى » بيان ايديليوردى . ايسته بوضورتله ، يالكز توركيه ده  
 وقوعه كلسين وهر كيم (بالخاصه روسيه) طرفدىن اجرا ايديليرسه  
 ايديلسين ، هر مداخله وقوعنده ، سوز اولاوروپانك اولاجقىدى .  
 عجباً بوماده ، شايد روسيه نك توركيه ده كى نفوذى قيريلرسه ،  
 روسلرك حمايه ايتدكلى ملتلك - مثلا افلاق وبغدانده كى  
 رومه نلرك - اسلام حاكميتدن آز چوق قورتولا بيله جكلرينه  
 وبوضورتله ذات شاهانه نك نفوذى خلددار ايله جكلرينه مى  
 دلالت ايديوردى ؟

فقط اوروپا بونك ده چاره سنى بولدى . افلاق وبغدان  
 برنسلكلرينك مختاريت تامه سنى بالذات توركيه يه قبول ايتديردى .  
 اهايليننده وحدت موجود اولديغى حالده ، بونلرى بربرندن  
 آييردى . بوضورتله مليت قاعده سى قسمايرينه كتيرلدى . رومهن  
 مشتريسنى روسيه نك آلدىن آلمق ايچون بوده كافي كلدى ؛ فقط  
 توركيه نك انقسامى تهلكه سنى وجوده كتيرمك ايچون كافي  
 كلدى . دهاسى وار : اوروپا ، انكلتره نك تشويق ايله ،  
 رومهن مسئله سنى بويله براويوشمه ايله حل ايتمكه قانع اولمادى .



تورکيه ده خرستيان اقوامک بولونماسدن طولايي تورکيه نك داخلې مسئله سنی ده يکي بر اصولده و هيتت عموميه سيله حل ايتمکه تشبث ايلدي . بو اصول ، اصلاحات اصولی ایدی . سلطان عبدالمجيد بوکا راضي اولمش ، دولت عثمانيه ده کی خرستيانلره اسلاملر کي عين حقوقی بخش ايله مشدی . ينه بو اصول ، اوآنه قدر اجرا و کنديسنه فائده لی اولديغی ایچون روسيه طرفدن تشویق اولونان اختلال اصولنه ده سد چکيوردي . بوندن باشقه خرستيان اورويانک ، خرستيانلره ظلم ایدن اسلام بر حکومتی حمایه ایتمی کي خرستيانلق نامنه ذل تشکیل ایده جک حرکتی ده تخفیف ایلوردي . خصوصيله ذات شاهانه نك حقوقه تجاوز و بو واسطه ايله روسيه نك آمالنه بالواسطه خدمت ایتمه رك مختلف ملتري ده خشنود ایدیوردي .

ایشته بو صورتله چارك تدبيرسز جه تشبثلری ، شرق مسئله سند ، روس امپلرینک صورت قطعيه ده افلاسی ايله نتیجه لشمسدی آرتق آروپا ، ایستر روسيه ، ایستر داخلده کی خرستيان قوملردن صدور ایتسین ، تورکيه یی هر درلو انقسامه قارشی حمایه ایدیور روسيه نك بو اقوامه یاردم ایچون مداخله سنی لزومسز بر ایدیور چونکه ذات شاهانه یه بونلردن بر قسمنک مختاریتنی تصدیق ایتدیریور ، بر قسمی ایچونده اصلاحات تکلیف ایدرل انلرک مدعیاتی کندی درعهده ایدیوردي .

## بر قونفره مقرر اتنك نه قيمتي وارمش ؟

مع مافيه پارسده كي اوروپا قونفره سنك تصويب ايتديكي  
وستريا - انكلتره سياستنده كي موفقيت دائمي التأثير دكلدي .  
الحقيقه بوسياست ، شرق مسئله سنك اساسني تشكيل ايدن  
چ عنصری بسبتون چوروتیوردی ؛ او عنصر لرده خرستیان  
وامده حس ملینك شدتی - روس احتراساتنك متاتی - تورکیه نك  
بر قابل تصحيح عطالت و تعصبی ایدی . ايشته ۱۸۵۶ دن ۱۸۷۶ یه  
نجیه قدر پارس قونفره سی احكامنك محوینه بو اوچ عنصر  
ب اولمشدر .

اوروپا، طونده مختاریت اداره بی حائزاییک پرنسلك وجوده  
نیرمکله رومهن ملیتی فدا ایله مشدی . رومهن ملی فرقه سی ،  
سفر فکر احرارانه پرورده ایدن چارایکنجی آلکساندر ایله  
ت قاعده سنه صادق قالان اوچنجی ناپولئونك تشویقیله اتحاد

چاليشمقدن گري طورمادي . فقط آنجق (متحد پرنسليگر)  
 نامني آلان هرايکي مملکتک مشترک اموري ايچون بر (قوميسيون)  
 آله ايتمکدن باشقه بر شيئه موفق اولامادي . اوزمان مسئلهني  
 حل ايتمک ايچون باشقه بر چاره آراي: هرايکي مملکت ايچون  
 بر پرنس اتخاب ايتمک . بو پرنس، آلکساندر قوچا، بر وعين  
 قاينه ايله مملکتی اداره ايدرك دول معظمه طرفندن دن تصديق  
 اولوندي . آرتق ۱۸۶۲ده رومانيا اتحادي وجوده کتيرلمش  
 ديمکدي . دهاصوگرا، بويکي حکومت، غرب اصولنده تشکيل  
 اولوندي . قوچا، کويلولري ا کدکلي اراضي به صاحب ايدرك  
 کنديلرينه حریت بخش ايدنجه، رومن هيئت اجتماعيه سي ده  
 (ده موقراتيک) اولدي . ۱۸۶۶ده پرنسک سقوطنه سبب اولان  
 عسکري اختلالندن سوگرا مملکتک اداره سياسيه سي ده مشروطي  
 و پارلمانتهر اولدي . شارل دو هو هنزوله رنک ارنی پرنسي اولمق  
 اوزره اتخابي، ذات شاهانه نك حاکميتني لفظي برحاله کتيردي .  
 يونانستاندن سوگرا، بوسفر اوروپانک ارزوسي خلافته اولارق،  
 رومانيا کندی حریت قطعيه سي تايمين ايله دي .

اوصره لرده صربستان ده، فرانسه سايه سنده، تورک عسکر لريني  
 چکدير مکه موفق اولدي . رومانيا ده اولديغي کي صربستان ده  
 بر مقدار ويري کي اعطاسي تابعيتک يکانه علامتي اولارق ابقا ايدلي .  
 ايشته بو صورتله تورک امپراطور لغنده کي خريستيان قوملر  
 پارس قونغره سنک کنديلرينه ويرمديکي مساعداتي تدریجي بر

صورتده آله ايتديلر. بونكده سببي فرانسه نك مليت مسئله سي خصوصنده مساعداورايشي وانكلتره نكده مداخلة ايده ميه جك برحاله بولونميسي ايدي؛ فقط بوندن اك زياده روسيه استفاده ايتدي.

روسيه حكومتي يالكز بوبالواسطه موفقيتلرله اکتفا ايمه دي. آوستريانك ۱۹۰۸ده عقلنه كلن جسورانه برمهاتله ۷۱-۱۸۷۰ فرانسه و آلمانيا حربندن بالاستفاده تکرار قره دکز مسئله سني موضوع بحث ايتمک ايچون فرصتدن استفاده ايتدي. فرانسه مغلوب اولدي، پروسيا فرانسه ايله اوغراشدي. انكلتره متجرد برحاله قالدي. بوسره ده چار، هپسنه بر نوطه کوندره ريك آرتق قره دکزه حاکميت خصوصنده پارس قونفره سنك وضع ايتديكي مقررانه تابع اولاميه جغني آکلاتدي. قرال ويلهلمک ديدیکی کبي بو، (آني برضربه) ايدي. انكلتره برقونفرانس طلب ايتدي. اوروپا، کندي مقررانك فسخ ايدله سنندن طولايي بوتجاوزي اوزرينه آلارق بوتکلیفي موافق کوردی. روسيه حكومتي بر قلمده قریم حربنك نتایجني سيليور، حال حاضری وجوده کتيريوردی. بوغازلر بيطرف قاليور، فقط قره دکز کاملاً روس حاکميته کيريوردی.

روسيه، بوديپلوماسی مظفريتلرني احراز ايلديکی صره ده اوروپاده شرق مسئله سني حل ايتمک خصوصنده کی اصول عزم پرورانه سنك عقیم قالديغني کوريوردی. فی الحقیقه سلطان عبدالمجید،



قریم حربنده کی اتفاقلرینک مکافاتنی اولمق اوزره فرانسه وانکلتره یه وعد ایتدیکی اصلاحاتی ۱۸۵۶ فرمانی ( ایله تنظیمات ) اعلان ایدیوردی. بو فرمان موجبجه خرسیتیانلر بوتون مأموریتلره قبول ایدیلیوره، خراج ویرمکدن عفو اولونیوردی. فقط، بالخاصه تورکیه ده، قانون ایله تطبیقاتی بیتنده پک بویوک مسافه واردر. سلطان عبدالعزیزک رأس کاره کتیردیکی کنج تورک فرقه سی یالکز پارچه پارچه اصلاحات یایمايه موفق اولمشدی. ۱۷۷۰ده فرانسز نفوذی قیریلنجه بوده فضله یاشایامادی. خرسیتیانلرینه عثمانلی تحکمندن شکایته باشلادیلر. حکومت برچوق اصلاحات وعدلرنده بولوندیغی حالده، روسیه نك تعقیب ایتدیکی عصیان پولتیقه سی، انلر ایچون حریتلرینی تأمین ایده جک یکانه اصول اولدیغی آ کلاشیلدی.

## روسیه نك انتقام تشبثی

۱۸۷۵ دن بری شرق مسئله سنك تاریخی ، الی سنه اول  
کچن وقایعك تکرار باشلاماسی ، عادتاییکی برطبعیدر . اولجه روملرک  
یابدقلمی کبی ، بوسفرده ( هر سک ) ده کی صربلرک آیاقلاماسی ،  
اولا اوروپانک بی فائده مداخله سنه ، دها صوکر استانبولی ده  
تهلکه یه القا ایدن دولت علیه - روسیه حربنه نتیجه ویردی .  
بوسفر انکلتره وحقی آوستریاده اوروپایه مراجعت ایدرک مظفر  
روسیه یه قارشی تورکیه یی ، بادهوا اولماق اوزره ، حمایه  
ایتدیلمر .

روسیه یی محکوم ایدن پارس قونغرہ سیندن بری روس  
دیپلوماسیسی دائماً موفقیت اکتساب ایللمکده ایدی . بوسیاست  
پانسلاویست ملی حرکاتی ، بالقانلرده کی اسلاو جمعیتی طرفدن  
فعلاً تشویق ایللمکده ایدی . ۱۸۷۵ ده ، بوسورتله روسیه نك

تشویقی کورر کورمن ، (هرسک) ده کی خرستیان صربلر عثمانلی اداره سنک تضیقاتنه قارشی عصیان ایتدیلر ، صوگرا قره طاغده کی صربلر حتی قره طاغ پرئسلکندن ده یاردم کوردیلر .

۱۸۲۶ ده ، ۱۹۱۲ ده اولدینی کبی ، دول معظمه عاصیلر ایچون ذات شاهانه دن اصلاحات ایستیه رک دول عثمانیه نك تکرار پارچالانسانه میدان ویرمه مکه چالیشدیلر ؛ فقط بوسفر « پروغرام دکل ، فعلیات » ایسته دیلر .

اوزمان ده ، اجنبی مداخله ، خرستیانلرک عصیاننه قارشی مدحت پاشانک کنج تورک فرقه سی اورتایه دیکیلدی . ۱۸۷۶ ده کی کنج تورکیه ، ۱۸۴۰ ویا ۱۸۶۰ ده کی کنج تورکلر کبی ، مملکتلری غرب اصولنده اصلاح ایتمک ایسته ين حریت پرور بر فرقه دکلدی . بونلر ملیت پرور ، صرف بصیرتلیر حبسیله مشروطی بر فرقه ایدی ؛ فقط خرستیانلرک اسلاو اتحادینه قارشی اتحاد اسلام ایله مقابله ایدیورلردی . استانبولده ، ۱۸۷۶ ده کنج تورکلرک ایکی دفعه عصیان ایتلری اوزرینه ، روسلره فوق العاده مطیع اولان سلطان عبدالعزیزک یرینه سلطان مراد خامس ، اقتدارسزلنجی ثابت اولان سلطان مرادک یرینه ده سلطان عبدالحمید پادشاه اولدی . بالقانلرده اسلاملرک تعصبی ، اجنبیلره واسلاو خرستیانلره قارشی طغیان ایتدی . سلانیکده فرانسر و آلمان قونسولسلر قتل ایدلدی . بلغارستان

شهرلری باشی بوزوقلر طرفندن قان و آتش ایچنده براقیلدی .  
بوصورتله ۲۵۰۰۰ کشی قتل ایدلدی .

خرستیانلره قارشی ، تورک باشی بوزوقلری طرفندن اجرا  
اولونان بو «بلغاروحشتری» ۱۸۷۶ ده انکلتیره نك مداخله سنی  
تأثیرسز براقیدی . نته کیم ۱۸۴۶ ده ده ساقز قتالی  
سلطان محمودک لهنده مداخله ایتمسینه مانع اولمشدی . ایوم  
اولدیغی کبی ، بوایکی وقعیه برده انکلیر افکار عمومیه سنک  
یک احرارانه ، بناء علیه خرستیان ملتله یک مساعد اولدیغی  
علاوه ایدلم . بوندن باشقه ، بوغازلر مسئله سی اصلا موضوع  
بحث ایدلمدیکی ویالکز خرستیانلرک مقدراتی نظر دقته آلدیغی  
جهتله انکلتیره نك منفعتی ، سیاسی عنعنه سی ، روسیه نك یالکز  
باشنه حرکته مانع تشکیل ایتیموردی .

ایشته ۱۸۷۶ ده بویله اولدی . هر سک اختلالی ، مختاریت  
اداره بی حائز صربستان اردوسنک یاردیمی ایله ، صربلر لهنده  
ملی بر حرکت شکلنه کیردی . فقط بومبارزه ده طرفین بر برینه  
مساوی دکلردی . صربلر ازیلنجه ، اوروپانک معاوتنی ایسته دیلر .  
روسیه ، درحال دول معظمه طرفندن مشترک بر مداخله یه سببیت  
ویردی . عبدالحمیده متارکه و اصلاحات توصیه ایتدی .

اوروپانک طلب ایله دیکی بو اوزون اصلاحات قومه دیاسنک  
برنجی پرده سی پارلاق بر اغفال ایله بیتدی . اصلاحاتی تطبیق  
ایتمه جک بر پادشاه طرفندن اصلاحات وعد ایدلدی ؛ اصلاحاتی

طلب ايدنلردن بر قسمی بوندن ممنون اولدی، بر قسمی ده قوه دن فعله کلسی ممکن اولاجغه صورتا اینانیر کبی کوروندی . فقط ۱۸۷۷ ضربه سندن سوکرا بوتخیل ، احتمال دائره سندن بیله حیقدی . بر چوق مذاکره لردن سوکرا مدحت پاشا ایله عبدالحمید کمال دبدبه ایله قانون اساسی اعلان ایدرک اوروپایی ممنون ایدیورکبی کوروندیله . سوکرا ، طلب ایدیلن اصلاحاتی عقیم برامق ایچون بو قانون اساسیدن استفاده ایتدیله .

بو حال ، انکلیزلرک تعقیب ایتدکلی صلیح پرورانه سیاستک افلاسی دیمکدی . بوسفرده اصلاحات اصولی اسلاملرک تعصبه و شرقلیلرک عطالته قارشى عقیم قالیوردی . آرتق سلاحه مراجعت ، خرستیان اقوام ایچون براحتیاج ، روسیه ایچون اخلاقی و سیاسی بروزیفه حکمنه کیریوردی . تورک حکومتک سوء نیتی اوروپایی بیطرف بولوندیرمایه مجبور ایتدیکی نسبتده بووظیفه نك ایفاسی قولایدی . روسیه ده پانسلاویست هیجاننک قوتی ، هر سکه باشلایان عصیانک رومه نلره ، صربلره و بلغارلره سرایتی ، دیگر طرفدن کنج تورکیه نك ملیت پرورلکی ، اجتنابی غیر قابل اولان بر حربه ایکی عالم بیننده بر مبارزه ماهیتنی ویریوردی . بو ایکی عالمده اورتودوقس اسلاولق ایله اسلام عالمی ایدی . چاره ذات شاهانه یه اعلان حرب ایتدیکی زمان ، تورکره قارشى هجوم عمومی امری ویرمش اولیوردی . فقط اسلاو اقوام هنوز تشکیلاته مالک دکلوردی .



بناءً عليه ۷۸ - ۱۸۷۷ بالقان حربنك بوتون بدلتی رومانیایله روسیه در عهده ایتمک مجبور اولمشردی. دهابدایتده رومانیاستقلالنی اعلان ایدرك اتحادینی موفقیتله تو بیجایتدی. اردوسنك معاوتتی ایسه، عثمان پاشانك قهرمانانه مدافعه سنه قارشیش آیدن بری (پلونه) اوکنده روسلرک پك زیاده ایشنه یارادی. (پلونه) ضبط ایدیلنجه، روسلر قیش اورتاسی بالقانلری کچرک استانبولی تهدید ایتدیله .

بوموفقیتلر، بوتهدید، انکلیرلرک مقابل مداخله سنی جلب ایتمک پك منطقی ایدی. ذاتاً عبدالحمیدده (قبریس) ویرهرك بومدخاله بی دعوت واجرا ایتدیرمکه موفق اولدی. روسیه بوسفرده (بیزانس یولی) اوزرنده انکلتریه قارشیکال فطانتله توقف ایتدی. فقط هیچ اولمازسه، کندی نفوذی نامنه، تورکیه نك ضررینه، خرستیان ملتلی خلاص ایدرك شرق مسئله سنی بوتون محیطی ایله حل ایتدم دییه افتخار ایتدی.

ایشته ۳ مارت ۱۸۷۸ ده چارایله ذات شاهانه بینده عقد ایدیلن وبالقان مسئله سنی هم ملیت قاعده سنه، هم ده روسیه نك عنعنوی منافعنه موافق اولمق اوزره منطقی بر صورتده حل ایدن، آیاستفانوس معاهده سنك احکامی بوندن عبارتدی. بو معاهده نتیجه سنده: رومانیانك، صربستانك، قره طاغك استقلالی، بوسنه هر سکنده کی صربلرک مختاریتی اعلان اولونمش، بالخاصه بوتون بلغارستان ایله ما کدونیا بی روس قونترولی آلتنده

برلشدیرن مختاریت اداره بی حائز بر حکومت شکلنده خراجگذار  
 بر پرنسلك تشکيل ایدلمشدی . تورکیه ، بر بردن آیری اوج  
 پارچه یه کسیله رک بسبتون قوتدن دوشورلمشدی . روسیه ایسه  
 رومانیا لیرک و صربلرک حریتی اکمال ، بلغارلرک خلاصنی تأمین  
 و بوصورتله بالقانلرده خراجگذار حکومتلردن متشکل بر سوری  
 مشتری وجوده کتیره رک افعالی موفقیته تویج ایدیوردی .  
 زیرا یک ای آ کلاشیلوردی که ، بویوک بلغارستان روسیه نك  
 تمامندن عبارتدی .

آرتق خرپستیان ملترک مظفرتی ایله شرق مسئله سنک  
 قاپاناجنی آن قطعی حلول ایتمش کیدی . فقط بوده عثمانلی تحکمنه  
 قارشی روس وصایتنک قائم اولماسندن باشقه برشی دکلدی .

اوزماندنبری حادثات ، بالقان اقوامنک بویکی حاکمیتدن  
 کندیلرینی قورتاراجق قدر متانت صاحبی اولدقلرینی اثبات  
 ایتدی .

فقط مسئله نك حللی یک ساده ایدی . خصوصیه روسیه یه  
 شرقده اودرجه بر نفوذ بنجش ایدیوردی که ، بو، انکاتره ایله  
 آوستریانک متفقلرینه ویا احتراصلرینه بر تجاوزعدا اولونابیلردی .  
 بناء علیه روسیه حرب ایله یورغون دوشنجه ، انکاتره نك  
 ۱۸۴۰ ده ایلری سوردیکی مسئله بی کوردی . یعنی شرق مسئله سی  
 بین الملل بر مسئله در ؛ بناء علیه تورکیه نك مقدراتنه قارشی بوتون  
 اوروپا علاقه داردر ، دینلدیکنی ایشندی .

روسیه حکومتی آوستریا ایله انکلتره نك سفر برلکی اوزرینه برلینده براورویا قونغرهنك عقدینه راضی اولدی .

فقط روسیه یه قارشلی انکلتره ایله آوستریا طرفدن تکلیف اولونان برلین قونغرهنسی ، آلمانیانك طور و حرکتی سایه سنده ، انکلتره ایله آوستریا ایچون بر آلت مقامنه قائم اولدی . فعلاً همان هرشی ، بسمارقك ، او «ناموسكار سمار» ك ، النده ایدی .

بسمارق شرق مسئله سندن نفرت ایتدیکی جهته صورت حلنی ده گندی سیاست عمومی سنه تطبیق ایتدی ، بو صورتله بر فرانسه - روسیه اتفاتی حاضر لادی . بناء علیه برلین قونغرهنسی آیاستفانوس معاهده سنی فسخ ایده مدیسه ده ، احكامنی روسیه نك علمینه چویردی . رومانیانك ، صربستانك و قره طاغك استقلالنه برشی دینلمه دی . حتی روسیه نك دكل ، فقط آوستریانك متدار و متشریلرینی یکی برر حکومت شكلنه قویارق اراضیلری ده بویوتولدی . بوسنه هر سكدده کی صربلر عثمانلی حاکمیتدن قورتولدیلر ؛ فقط الحاقه قدر آوستریا اداره سنه تابع اولدیلر .

صوکر ا خراجگذار بلغار پرنسلیکی ده اوچده ایکسسه تنزیل ایدلدی . بری ، مختاریت اداره بی حائز روم ایلی بی تشکیل ایتدی ؛ دیکری یعنی ما کدونیا ده ، بالطبع اصلاحات و عدیه ذات شاهانه ده براقیلدی .

برلین قونغرهنسی ، اون طقوزنجی عصرده ، بالقانلرده آوستریا - روسیه دوئلوسنك باشلانغجی ارا نه ایدز . آوستریا ،

آلمانيايه استتاد ايدرك ، اخافه اصوليله ، روسلرك مظفرانه  
مساعيلرى ضررينه ، مليت حقوقك ضررينه اولمق اوزره  
كنديسك شرقه عانداحتراصلرينه اوروپايي راضى ايمكه موفق  
اولدى . بناء عليه ۱۸۷۸ ده موققيته بادي اولان بر اصولى  
آوستريانك ۱۹۱۲ ده تكرر ايمسى نهدن موجب حيرت  
اولسون ؟

## برقونغره مقررآتئك اهميتى

تاريخده تكررى انكار ايدنلره برلين قونغره سنك مقررآتى پك كوزل بر درس تشكيل ايدر! كذا بو حال ، اوروپا ليلرك خودپسندلكرينه مستند تدبيره قارشى مليت حقوقك شهبه سز كج ، فقط ضرورى مظفريته اينانلر ايجون ده پك زياده باعث تشويهدر .

پارس قونغره سى كجى برلين قونغره سى ده آوستريا وانكلتره ايجون بر موفقيتىدى . بوده طبق اونك كجى ، عين سبيلردن طولايى ، موقت برغالييتدن عبارت قالمشدر . وقتيله رومانياه اولديغى كجى ، بوسفرده بلغار وروم ملتلى ، فدا ايدلكرندن طولايى كندى انتقاملرني آلمشدر . بوسره ده توركيه آز چوق اصلاحاته قابىلىتى كورولمش ، ۱۸۷۶ ده اولديغى كجى ۱۹۱۲ ده ده خرستيانلر اول امرده عصيانه مراجعت ايتمشدر . رومانيا ليلرك پارس قونغره سى مقررآتئه قارشى ياپدقلىرى



کبی ، بلغار ملتکده برلین قونغرہ سندن انتقامی ایکی صفحہده تجلی ایتدی : ۱۸۸۵ ده اتحاد ، ۱۹۰۸ ده استقلال . بلغار ملی فرقهسی اولا آیری آیری حرکت ایلدی . بلغار پرنسلکنی اولا روسلرک عسکری استبدادندن قورتارارق آکساندر دو باتنہرغک ادارهسندہ مشروطی بر حکومت حالہ کتیردی . تورکلرک روم ایلی شرقی ولایتدهده بر مجلس ایله بر میلنس تشکیل ایتدی . صوکر ا فلبہ اختلالی ایله ۱۸۸۵ ده بو ولایتک پرنسلکنہ الحاقی اعلان ایلدی . صربستانک حسدینہ ، روسیہنک آلدای تیلمش اولماسنہ رعماء ، سلطان عبدالحمید بلغارستان ایله روم ایلی شرقینک آکساندر دو باتنہرغ ادارهسندہ برلشمہسنہ راضی اولدی .

اوزمان آوستریا - روسیہ دوئللوسی صوفیہ حکومتی زرنده دوام ایتدی . روسلر طرفندن پرنسی آکساندرہ قارشی استانبولوفک ملی فرقهسی فردیناند دو قوبورغی اتخاب ایتدیردی . بوذات ، اولا آوستریایہ استناد ایدرک مملکتده تنسیقات اجرا ایتدی . قوتی تزید و بلغار حکومتی تشکیل ایتدکدن صوکر ا ۱۸۹۶ ده روسیہ ایله باریشدی . بوسایهده ، ۱۹۰۸ ده اوروپانک مقرر اتیلہ آوستریانک اجرا ایله دیکی حرکتن بالاستفاده ، بالادن کوردیکی مثالی تعقیب ایدرک خراجگذار پرنسلکنی مستقل بر قراللق حالہ کتیرمکه موفق اولدی . تورکیہ بوکاقارشی بویون آکمه مجبور اولدی ؛ چونکہ فردیناند ، دول معظمہنک

معاونتدن باشقہ ، بلغارستان ایچون صوک درجہ یکی ، ملی بر اردونک قوتی تأمین ایلمشدی .

بلغار قومنک بو مظفرتی ، صرب قومنک مغلوبیتنه قارشی بر نوع فدیة نجات دیمکدی . فی الحقیقه آوستریا ، اوروپانک برلین قونغرہ سنده کندی اداره سنه تودیع ایله دیکی بوسنه هر سکی آچیقدن آچیغه ، ساده جه الحاق ایلمشدی . آلمانیانک یاردیمی ، روسیه نک ژاپونلرله اجرا ایله دیکی حربدن طولانی ضعیف دوشمه سی اوزرینه ، اوروپانک مقررانته قارشی بوتجاوزی اوروپایه ایستر ایسته من قبول ایتدیردی . آوستریا حکومتی بو صورتله ۱۸۷۱ ده روسیه نک یاپدیغنی تکرار ایدیور ، (سیرمیا) ایله (اسلاوونیا) ده کی صربلری آلدقن صوکر ، شمدی ده بوسنه ده کی صربلری کندی اراضیسنه الحاق ایدرک سلانیکه طوغرو ایلرلیوردی . برمدت کوچوک صربستان ، الحاق ایدیلن قارده شلرینه یاردم ایدرکی کوروندی ؛ فقط روسیه کندیسنه یاردم ایتدی .

نهایت یونانستان کرید مسئله سنی ، فعلاً دکاسه ده ، حقوقاً حل ایتک ایچون بو فرصتدن استفاده ایتک ایسته دی . یونان ملی فرقه سی ، روملرله مسکون اراضی یی یونان قرالغنی ایچون طلب ایدیوردی . بو اراضی ده : تسالیا ، آپیر ، کرید و آطفلر دکزنده کی جزائر ایدی . تسالیا مسئله سنی ، فرانسه سایه سنده ۱۸۸۱ ده حل ایدلمشدی ؛ فقط آپیرک قسم اعظمی ، برلین قونغرہ سنده کی وعدلر خلافتنه اولارق ، تورکلرده قالمشدی .

کاملاً روم اھالينک عصيانيله همان متماًدياً موضوع بحث اولان کريد مسئلهسى ۱۸۹۷ ده برعثمانلى - يونان سفرينه سيبيت ويردى . بو حريده تورکلر غالب کلديلر . روسيه نك تشبثي اوزرينه اوروپا ، تورکلرک استيلاسنى طورديرارق فيما بعد دول معظمه نك ضمانى و بر يونان واليسنک ادارهسى آلتنده کريده مختاريت ويرلمه سنى جبراً تکليف ايتدى . کريده کى مى فرقه ، بونکله برابر آطه نك الحاقى طلبدن کرى طورمادى . قرال ژورژ بوارزويه قارشى طورارق تاجنى تهلکيه دوشورمک درجه لرينه کلدى . فقط بر کريدلينک رئيس وکلالغه انتخابى ۱۹۱۰ دن اعتباراً الحاقک مقدمه سنى تشکيل ايله دى . بو الحاقى ۱۹۱۲ حربى تماميله قوه دن فعله کتيردى .

۱۸۹۸ ده ، هيچ اولمازسه اوروپانک اھتامى ايله کريدک قورتارماسى ، مليت قاعده سى ايچون موجب ممنونيت بر موفقيت تشکيل ايتدى . فقط ما کدونيا خريستيانلرى اولان کندی رقابتلرى ، و بوندن باشقه اوروپانک ارزوسندن طولايى تورک حاکميتى آلتنده قالمشلردى . آتیده بحث ايده جکمز بورقابتلر ، اختلال ايدرک کنديلرني قورتارمالرينى غير ممکن قيليور ، انکلتره ايله روسيه نك اصلاحات اصولى ايچون ما کدونيا يي بکيدن بر ساحة تطبيق حالنه کتيريوردى . فقط بو اصلاحات ينه هيچ بر طرفده موفقيت حاصل ايتيوردى . بو ائنده اوروپا کندی تشبثلرينک تأثير ايده جکمه ذاهب اوليور ، سلطان

عبدالحمید ایسه بونی آکلامازلقدن کلیور ، دول معظمه ایله  
 آکله نیوردی . باشده آوستریا و روسیه اولدینی حالده دول معظمه ،  
 بالقانلرده آرهلرنده مناقشه تولید ایده جک بر مسئله اورتایه  
 چیقارمقدن اودرجه اندیشه ناک اولیور لر ، بو مسئله یی موضوع  
 بحث ایتمه مک ایچون او یوشیور لر دی . ایشته ۱۸۹۷ ده آوستریا  
 ایله روسیه نك اعلان ایتدیکی ( استاتوقو ) قاعده سی و ، کذا  
 دول مذکور طرفدن ۱۹۰۳ ده اورویایه تکلیف ایدیلوب  
 اورویاچه قبول وسلطان عبدالحمید طرفدن نظر اعتباره آلتان  
 ( موئه رچته غ ) اصلاحات پروغرامی بوندن باشقه بر صورتله  
 تفسیر اولنه ماز .

شبهه سز عبدالحمید غیر قابل اصلاح ایدی . خصوصیه معهود  
 دوستی ایکنجی ویله لمک کندیسینی دایما حمایه ایتسی او درجه  
 هیجانه میدان ویرمیوردی . فقط ۱۹۰۸ تموزی ایله ۱۹۰۹  
 نیساننده کنج تورک اختلالی وقوعه کلنجه ، اورویاچه دولت  
 عثمانیه ایچون بر دور ترقی آچیلماسی امید ی حاصل اولدی .  
 کنج تورکلر یکی بر فرقه دکلدی ؛ رأس کاره کللری ده  
 برنجی دفعه دکلدی . کنج تورکلر ملیت پرور و مرکزیت  
 طرفداری ایدیلر . ۱۸۷۶ دن سوکرا اولدینی کبی ، ۱۹۰۹ دن  
 سوکراده بومسلکده ، فقط آرهلرنده تفرقه اولدینی ایچون او  
 درجه اصوله موافق اولماق اوزره دوام ایلدیلر .  
 بونلره پک زیاده امید باغلایان اورویا ، نهایت خطاسنی

آكلادى. بو اختلاک تجددە بادی اولماسنى آكلایارق بونك بر  
 نوع تورك فترتی اولدیغنی كوردی. فی الحقیقه تورك ایمپراطورلغی  
 اصلا قابل اصلاح دکلدی. اوروپا بونی سویله مهدی، فقط آكلادی.  
 ماكدونیا، دائمی صورتده عصیانہ دوام ایتدی. روسلر آرتق  
 خلاصکارلقدن واز کچدکلری ایچون ماكدونیا نك کندی  
 خلاصکارلرینی قاپولری اوکنده کورمه لری زمانی یا قلاشیوردی.



۱۹۱۲ - ۱۹۱۳ بحرانی

خرستیانلرک احوال و وضعیتلرندن طولایی موجود  
قاریشقلقردن دولایی متمادیاً موضوع بحث ایدیلن شرق مسئلهسی،  
نهدن برلین قونغر مسندن آنجق اوتوز بش سنه سوکرا حل  
ایدیله بیلدی؟ قباحت، هیچ شهه سز اوروپاده در؛ چونکه  
اوروپا، دائماً اصلاحات کبی آرتق مبتدل و غیر قابل تطبیق بر  
چاره حل توصیه ایدیوردی. بو چاره حلك یکانه مزیتی،  
اوستریا ایله روسیه بی طوغرودن طوغروه حال اختلافده  
بولوندی راجق بر تصفیه معامله سنی کجیکدیر مکدن عبارتدی.  
فقط مسئله سنک اصل حقیقی چاره حانی جبراً قبول ایتدیرمک،  
بر طرفدن ما کدونیا خرستیانلرینک، دیگر طرفدن بالقان  
حکومتلرینک وظیفه سی ایدی. بو چاره حلده، ملیت اساسنه  
مستند بر استقلالدن عبارتدی. واقعا دوچار مظالم اولان بو عرق  
ویادین قارده شلری، رومانیا لیلرک، صربلرک و بلغارلرک اجرا

ایلدکلری حرکاتی ۱۹۱۲ یه قدر تأخیر ایتشلردی؛ فقط بونک سببی، آرهلرنده تفرقه اولدیغی جهته، بو حرکتی اجرا ایده جک درجه ده کندیلرنده قوت بولاملرنندی .

بلغار، صرب و یونان ملتلی ما کدونیا یی پابلاشماق ارزو ایدیورلردی؛ ما کدونیا ده اوچ ده مقدارینک تعیینی غیر ممکن بر نسبتده اهالی ایله کندیلرینی تمیل ایدیورلردی. فقط صوفیه، بلغراد و آتته ده باصیلان خریطه لر، عاداتا بر آلت مناقشه دن باشقه بر شی دکلدی . بو خریطه لرده خرستیان رقیلردن زیاده تورکیه نك خیرینه حرکت ایدیلیوردی. بو حال، خرستیانلرک گندیلرینه ظلم ایدنلرک کوزلری اوکنده بر برینک کوزینی اویارق انلری محظوظ و مستفید ایله دکلرینه بر علامت دیمکدی . کذا بر طاقم مسلح چته لرواردی که، بالقان حکومتلی بونلرک تشککنه مانع اولیورلر، آرهلرنده کی قانلی اختلاف لره فترت تولید ایدیورلر، بوسایه ده اسلام حاکمیتنی ادامه ایدرک اوروپا نظرنده ما کدونیا نك قدرینی کوچوک دوشورینیورلردی .

فقط، مع التأسف، بالقان حکومتلی بیننده کی تفرقه نك یکانه سببی بودکلدی . بلغارستانک ترقیسی، مختلف اسبابدن طولایی، اوچ خرستیان حکومتی کندی علیه نه قالدیرمشدی. ۱۸۷۰ ده استانبول روم بطریق لکندن بسبتون آیری بر بلغار کلیسا سنک تشککی ایله نتیجه له نن آریلغه قارشی روم بطریق لکی بلغارلری آفوروز ایتمشدی. ما کدونیا ده درت بلغار بسقبوسلغنک

تشکیلی ایسه ۱۸۹۶ ده روملغه قارشی اورولان یکی برضر به ایدی. یونانستان نصلکه بلغارلرک دینی استقلاللرینی پروتستو ایدیورسه، صربستان ایله رومانیا ده سیاسی ترقیلرندن طولایی اندیشه ناک اولیوردی. بلغار اتحادی ائناسنده صربستان سلاحه صارلمش، دوچار اولدیغی انهزام، اندیشه لرینک حقسنر اولمادیغی اثبات ایله مشدی. رومانیا ایسه بوقوتلی قومشوسنه قارشی تورکیه ایله ائتلاف ایتک درجه لرینه گلشیدی. بالقان حکومتلری، بوضورتله یکدیگرینه رقیب اولنجه، آرتق دول معظمه نک برر آلتی مقامنه قائم اولمشلردی. یونانستانی انکلتزه حمایه ایدیوردی. ۱۸۶۳ ده دانیمارقه لی پرنس ژورژک جلوسنی تسهیل ایدن، ۱۸۳۵ دن بری اشغال ایلدیکی یونان آطه لرینی ۱۸۶۴ ده ترک ایله یین، ۱۸۹۸ ده کریدی قورتارمق ایچون روسیه یه التحاق ایدن انکلتزه ایدی. صربستان، میلان ایله آلکساندر اوبره نوویچ زماننده، آوستریایه تابع ایکن، بیه رقره ژورژه ویچ زماننده روسیه یه یاناشیوردی. بلغارستان، اتحاددن اول روس محمیسی ایکن، فردیناند دو قوبورغ زماننده، ۱۸۸۷ دن صو کرا آوستریانک محبته، ۱۸۹۶ دن صو کرا ده روسیه نک محبته استناد ایدیور، ایجابنه کوره هر ایکیسندن ده استفاده یولنه باقیوردی. رومانیا، شارل دو هو هنزوله رن زماننده. روسیه ایله بوزوشما قله برابر - آوستریا ایله آلمانیا یه تقرب ایدیوردی. دها صو کرا

قره طاغ ، ايتاليابه بزقراليجه ويره رك قره طاغك آرناوودلقده كي پروژه لرينه خدمت ايتمك ايتيوردى .

بالقان حكومتلرينك حيات سياسيه لرى نابهنگام برصورتده وجوده كمله لرينك تاثيرى آلتنده بولونديغى جهتله ده بو حكومتلر برر آلت ايديلر . اوروپا اصولنده تحصيل شرق كويلولرى ييتنده انتشار ايدنجه ، برچوق كشير اورتايه چيقيورلر ، يكي حكومتلك اوروپا كازى تشكىلاتنده كنديلرينه مأموريت بولمق وكنج احتراصلرينى طويورمق ايتيورلردى . اوزمان سورولرله مأمورلر و آووقاتلر چيقيور ، اك كوزى آچيق اولانلرى سياسته داخل اوليوردى . قابينه لرك وحتى اصول اداره لرك سوره كسز اولماسى ، اردونك نفوذى ، رجال سياسيه نك رقابتلرينى موجب اوليوردى . بنساء عليه بو حكومترده وكلا بحرانلرى ايله عسكرى ضربه حكومتلر ، برچوق زمانر مشترك ودرجه شمولى واسع برحركت اجراسنه مانع اولمشدى . فقط پرنس فرديناند ، له ئوپولدك عرقندن ، حقيقى قوبورغلى بر پرنس ايدى . بوذات ، استانبولوفك اداره حكومتده حاصل ايله ديكي ديكتاتورلك روشنندن حكومتى قورتاردقندن سوكرام ، ايش يومر كزده قالمامشدى . فرديناند ، روسيه ايله باريشير باريشماز ، دول معظمه يه كندىنى تصديق ايتديرر ايتديرمز ، بلغارستانى يكي بر حكومت حاله قويوش ، بالخاصه فنا يتشديرلمش وفرانسز اسلحه سيلاه تجهيز ايدلمش مى براردو صاحبي ايتمشدى . حتى

جرأتکارانه و موفقیت پرورانه اولماسیله بوتون اوروپایی حیرت لر ایچنده براقان بالقان اتحادینک ۱۹۱۲ سنه سی مایسنده عقدی اثناسنده فردیناندک شخصی بر اشتراکی اولدیغنه هیچ شبهه ایدیه مز . نهایت بالقان شبهه جزیره سنده کی دوت خرسیستان حکومتی ، آر لرنده حکم فرما اولان تفرقه بی اونوتارق دشمن مشترک لرینه ، تورکلره قارشی برلشمش لر ، ما کدونیا ده کی خرسیستانلرک مدافعه سنی درعه ده ایله مشلردی .

۱۹۱۲ سنه سی صوگ بهارنده اوروپا کندی صلح پرورانه اصولنی تطبیق ، تورکلردن اصلاحات طلبنه پک زیاده غیرت ایله مشدی . فقط بالقانلرده کی خرسیستان حکومتلر داخلی ترقیلری و اتحاد لر یله ، اوروپانک کندی لرینه تأمین ایدیه میه جکی براستخلاصی کندی کندی لرینه طلب ویا تأمین ایتمه ک تشبث ایله مشلردی . روسیه نک ۱۸۷۷ ده کندی له لرینه درعه ده ایله دیکی وظیفه بی اسلاو حکومتلر ، یونانستان ایله برله شنجه تمامیه ایفا ایدیه جک درجه ده قوت اکتساب ایله مشلردی . اوروپا اصولنک آشکار برصورتده افلاسی ، ۱۸۷۷ ده اولدیغی کبی - قوته مراجعتی مشروع کوستریبور ، حتی امر ایدیوردی . یالکز بوسفر روسیه ، ۱۸۷۷ ده اولدیغی کبی ، یکانه بالقان دولت معظمه سی دکلدی ؛ روسیه آوستریائی ده نظر اعتباره آلمق مجبوریتده ایدی . بناء علیه بوسفر یردن قیملد امامشدی . متفکر بو خصوصه هیچ آلدانما مشلردی . حتی کندی لرینه



وقوع بولان صلح پروانه تکلیف لک هپسنى رد ایتشلردی . چونکه کندیلرینی کاملاً حاضر عدایدیورلر ، بوندن باشقه آوستریا و روسیه رقابتدن طولایی اوروپانک بومسئله بی اورتایه قویماق ایسته دیکنی بیلورلردی . بوسیدن سریع و مکمل بر صورتده حرکت ایتدیلر . قره طاغیلر ( اولکون ) ، ( طاشلیجه ) ( ایپک ) و اشقودره بی ؛ صربلر ( ییکی بازار ) ، ( پرزرین ) ، ( دبره ) و ( مناستر ) ی ؛ بلغارلر ( سلانیک ) و ( ادرنه - استانبول ) یوللرینی ؛ روملر ( سرفیجه ) ( سلانیک ) ، ( یانیه ) و ( ارگری ) بی آلدہ ایتشلر ، آطه لر دکزنده عصیان ایتشلردی . ایشته بو ، ملیت اساسنه مستدأ شرق مسئله سنک علاقه دارلری طرفدن حلی ایدی . واقعا بواننده آوستریانک مداخله سی اوروپا وضعیتنی تشویق ایدیور ، بوندن باشقه ده اسائر اختلاف لک ده ظهوری ملحوظ بولونیوردی ؛ فقط بو حال ، شرق مسئله سنک حلی اولمق اعتباریله طوغر و ایدی . فی الحقیقه بواننده اوروپا دیپلوماسیسی اتفاق مثله قایلمشدی . آوستریا ، اسکی صربستانده کی آمالنک زیروزبر اولدیغنی کورونجه ، آرناوودلنی ، ایتالیا ده ( آپیر ) ده واحتمالکه آرناوودلقدہ کی آمالنک قیرلدیغنی کورونجه ، آطه لر ی طلب ایله مشدی . ۱۸۷۸ دن اعتباراً اولدیغنی کبی ، بو حرب ائناستده ده آوستریا - روسیه اختلافنک احتمالی وحتی قورقوسی اوروپایی تحت تأثیری آلتنده بولوندی ریوردی . ایشته حربدن اول بالقان

استاتوقوسنك محافظه ايديله جكنى بيان ايتمك كې تدبير سزجه بر اعتراف ، متفكر بو استاتوقوي مظفريتريله آلت اوست ايتدكلى زمان كوستريلن بى طرفلق ، دها صوكرابوي طرفلى جرم مشهود حالده نقض ايدرك قره طاعه قارشى مشتركاً مداخله اجراسى ، هپ بونى اثبات ايدىوردى . فقط بو اختلاف قووقوسى (نتايجده اثبات ايتدى كه) آوستريادن زياده روسيه ده دها شدتلى ايدى . بوندن باشقه ، آوستريا بو قورقودن استفاده ايتمش وديشلىرىنى كوستره رك بوتون اوروپايي پيشنده سوز و كله مشدى . واقعا روسيه حكومتى عنعنوى سياستك تركندن طولايى - پك حقل اولارق - فرياد ايدن پانسلاويست تحريكاته رغماً صلحه بودرجه مربوطيت كوسترمش ايسه ده ، شوراسنى ده نظر دقتدن دوز طومتامليدر كه ، بو حركت ، هيچ اولمازسه قسماً حرب قورقوسيله اختيار ايدلمشدى .

انكاز سياستى نظر اعتباره آله جق اولورسه ، بو قورقو تماميله تظاهر ايدر . انكلتره ، اون طقوزنجى عصرده روسيه نك لشبئانه قارشى دائماً محتاج و هيچ بر مقابل تعويض وجوده كتيرمه دن اسلاولرك شرقى اوروپايي استيلا ايتسنه مخالف كوزونمشدى (۱) ۱۸۷۶ ده انكلتره نك اختلاللر واسطه سيلاه

(۱) احرار ايله محافظه كارلر بو نقطه ده متحد درلر ۱۸۴۰ ده دولت عثمانيه نك تماميت ملكيه سى بر احرار ، پلرستون طرفندن اعلان ايدلمش . ۱۸۷۸ ده بر محافظه كار ، ديزرائلى طرفندن تطبيق اولونمشدر .

خرستيان اقوامى خلاص ايله دىكى - فقط روسيه قارشى سفر برك اجرا ايدەرك ۱۸۷۸ دەدە بو استخلاصى توقيف ايتدىكى دقتە آلەجق اولورسە ، بونك اسبابى آچيقدن آچيغە تظاھر ايدر . انكلترە ، اصولاً نہ روسلرە ، نەدە اسلاولرە معارضدر ؛ فقط شرقى اوروپادە قوتلى بر حكومت بولونديغنى كورمك ايستەمز . شمدي يە قادار بوتون تهلکه روسلردن ويا انلك اسلاو تابعلردن كمشدر . بوسيدن قرە طاغك آبلوقەسى مسئلە سندنە ، انكلترەدە آوستريايە تبعيت ايتمشدر . شرق حقتە ، ائتلاف مثلتە حاصل اولان بو اختلاف ، روسيەنك غير متعدى حر كتنك ، قرە طاغك آبلوقەسى مسئلە سندنەدە آوستريانك مكرراً واقع اولان اصرارينك موفقتلە نتيجه لنمى اسبابى پك كوزل ايضاح ايدر .

بونكلە برابر انكلترە عسکر چيقارمقدن امتناع ايتمش ، و بو امتناع اشقودرەنك سقوطنە سييت ويرمشدر . دها صوكر ، آوستريا احتراصاتنك مفرطانە اولماسى ، وقتيلە انكلترەنى روس احتراصاتنە قارشى اورتايە چيقاردىغى كى ، شمدي دە آوستريا احتراصاتنە قارشى ميدانە چيقارمشدى . اويلە ظن اولونوركە ، انكلترە بونى آرتق بوكوندن اعتباراً آكلامشدر . روسلرك استانبول ايچون تهلکه تشكيل ايتدكلى زمان نصلكە آوستريايە ياردم ايتدى ايسە ، بوندن بويلەدە آوستريا تهلکه سنە قارشى روسلرە ياردم ايلكەددر . آوستريانك مظفريتى بيلە ائتلاف مثلثى تقويه

ایده جکی کبی، آوستریا ایله روسیه بینده آرزو چوق یاقین بر استقبالده  
اختلاف ظهوری ده ممکندر .

مع مافیه آوستریا، شبه جزیرہ نیک غربنده مختاریت اداره بی  
حاز بر آرن اوودلق تأسیسنه موفق اولمشدر. وحشی و تشکیلاتدن  
محروم اسلاملرک منافعه اولمق اوزره ملیت اساسنه مستند  
و اساساً موجودی ملیت اساسنه مغایر اولان بر قاتولیک حکومت  
طرفندن وقوع بولان بومطالبات، دیپلوماسی اصوللرینه اودرجه  
آلیشقین اولمیان فکرلری دوچار حیرت ایده بیلیر. فقط حقیقت  
شودرکه، قاتولیک آرن اوودلرک حمایه سنی در عهده ایدن  
آوستریانک بوحق مداخله سنک اساسی اوتدن بری تعقیب  
ایلدیکی (دخول صلح پرورانه) دن باشقه برشی دکلدر: مع مافیه  
بو سیاست، جنوبده (آلونیا) دن ایتالیانک تعقیب ایله دیکی  
سیاستله چار پیشا حقدر (۱) .

فقط مقصد (سلانیک) ایکن شمدی، اشقودره ایله  
برابر بیله اولسه، ینه شمالی آرن اوودلق آزدرد. بوسیدن متقلل  
اره سنده کی تقسیم اراضی مسئله سی - اورویا نقطه نظرندن هیچ  
برفائده بی منتج اولمیان بومسئله - هر نه صورتله اولورسه اولسون،

(۱) بو اثر یازلدق دن سوکرا، آرن اوودلق حقنده آوستریا ایله  
ایتالیانک ائتلاف اتمسی رسماً تحقق اتمش بر حقیقتدر. اصل مسئله،  
اوروپانک وبالخاصه انکلتره نیک بو تقسیمه بالآخره نه صورتله مساعد  
ایده جکی آکلامقدر .

اصل مهم نقطه بالقان حكومتلرينك كندی بينلرنده ودول معظمه ايله اولان مناسبتلری مسئله سيدر . حال بو كه بومسئله لر هپ يكدیكرينه مر بوطدر: روسيه ، مظفريتدن صو كرا اتحادي ابقا ايمكه واسلاملره فارشی عقد اولونان استلافی جرمانلغه فارشی دوام ايتدير مكه چاليشا جقدر . آوستريانك مقصدی ايسه بو اتحادي طاغيتارق مختلف حكومتلری يكدیكری عليه تشويق ايله مكدرد . مع مافيه شوراسی استدلال اولوناييلير كه ، (سلستره) نك تركی اوزرينه يكدیكری ايله برلشدكن صو كرا نه بلغارستان ، نه ده رومانیا برجهتلی سياسته اسير اولماي اچقذر ، كندیلرينك موفقيتتی تأمين ايدن (باسكول اصولی) نى تعقيده دوام ايله جك كدر .

صربستانه كلنجه ، صربستانك حر كتی ، اغلب احتمال آوستريا سياسته تابع اولاجقدر . چونكه بو خصوصده بالقان مسئله سی آوستريا مجارستان مسئله سنه قاريشمقده در . آوستريا اهالیسنك نصقندن زياده سی اسلاو در . شو حالده ايكیدن بری وارد خاطر اولاييلير : آوستريا ، يا جرمانا لاشدير مق سياستنده دوام ايدده جك ، كه او زمان خارجه وحتی كندی حدودی داخلنده جرمن واسلاو مبارزه سنك او كنی آلمق غير قابلدر . بودوئللو بر آوستريا - روسيه دوئللو سيدر كه بو دوئللويه صربلر ، وهیچ شبهه سز ، بالقان اسلاولری ، احتمالكه آلمانیا وفرانسه ده داخل اولاجقدر . ويا خود ويانه حكومتی اولا بو همیاده كي چهلره ، بعده خرواتلره ، ۱۸۶۷ دن بری ماجارلرك استحصال ايله دككری مختاريت به كزر بر مختاريت

بخش ایده جکدر. اوزمان آوستریا ماجارستان حکومت مناسبی بر هیئت متحده حالنه کیره جک ، بوهیئنده صربلر ایله چهلر ماجارلر ایله آلمانلره قومشو اولاجقلردر. بویه هیئت متحده دن مرکب بر حکومتده صرب عنصرینک یوتولوب محو ایدلمسی امکان خارجنده در .

واقعا طونه مجراسنی کاملاً ایمپراطورلغه تأمین ایتمک ایچون رومن عنصرینک غالب ایدلمسنه تشبث ایدیله جکدر ؛ فقط بو تشبثده روسیه نك حرکتنه معروض اوله جقدر .

اوزمان روسیه ده رومانیایله بلغارستانده ؛ واقعا اودرجه قولای اولماق اوزره ، عین مسلکی تعقیب ایده جک ، بناءً علیه آوستریایی نه طونه دن قره دکر ساحلنه ، نه ده ( واردار ) دن آطه لر دکزینه قدر کلکه براقیه جقدر. بو خالده ینه آوستریا روسیه مبارزه سی حاصل اوله جقدر .

فقط بواثناده ، انکلترونک عنغوی سیاستدن معدود اولان باسکول اصولنک ، هر نه اولورسه اولسون ، ظهور ایتدیکی کوروله جک ، اوروپا هیچ مداخله ایتیه جک ، فقط انکلترونک حکومتی غالب اولان طرفی طور دیر ارق مداخله ایده جکدر .

دها صوکر ا بوغازلر مسئله سی ایله آناطولینک تقسیمی مسئله سنک حلی قلاجق ؛ بوده ایکنجی بر شرق مسئله سنی تشکیل ایده جکدر . فقط بویابده شمیدین بر شی سویلنه مز ؛ چونکه بو خصوصده تصادم ایده جک اولان روسیه ، انکلترونک



و آلمانیا منافع معظمه اقتصادیه سنه دائر هنوز معلوما تمز یوقدر .  
 روم ایلی ایچون ( چونکه غازلر بر حدود عد اولوناماز )  
 مسئله حل ایدلمشدر . بر عصرلق مساعیدن صوگرا ، بوکون  
 خرستیان ملتر ، اولا روسیه نك ، صوگرا کندی غیرتلی  
 سایه سنده ، مستقل حکومت حاله کلمشدر . روسیه حکومتی  
 ۱۸۷۸ سنه سنه کلنجیه قدر نصلکه انکلتراه قارشی مجادله ایتمش  
 ایسه ، بو حکومتلرده بوندن بویله آوستریا ایله اوغراشاجقلردر .  
 شرق خرستیانلرینک اسلامله قارشی مجادله سی آرتق ختام  
 بولمشدر ؛ بوندن صوگرا ده اسلاو جرمن مجادله سی حاضر لانیور .

## خاتمه

پول هوری نك بو كتابندن آ كلاشیلوركه ، اوروپانك اوتهدن بری مقصدی ، عثمانلیلری رومایلندن چیقارمق ایدی . بو کون بو مقصد همان حاصل اولمش کیدر . فقط عثمانلیلرک مسلسل فلاکتلرینک بوتون صفحه لری تدقیق اولدینغی زمان کورولیلورکه ، دول معظمه نك غدارانه سیاسترینه قارشی عثمانلیلرده هیچ بر اثر انبواه حاصل اولمامشدر . بو حالت فکریه ، الآن موجوددر .

عثمانلیلر ، اوروپانك ترقیسنه ، مدنیتنه ، خارق العاده سیاستنه قارشی دائماً جهالتله مقابله ایتمشلردر . شرق امسئله سی باشلامازدن اول ، بوسیاسته قوتله مقابله ایدیورلر ، خصم لری نك ضعفندن بالاستفاده تشبثلرنده موفق اولیورلردی . فقط بالآخره علم و فن اوروپاده ترقی ، تورکیه ده اهمال اولونجه ، عثمانلیلرک اسکی موفقیتلرندن اثر کورولیلوردی .

عثمانلیلرک سیاسی موفقیتلرینی عقیم براقان باشلیجه سبب ، عثمانلیلرده جوال فکری ، علوم سیاسییه واقف ، سیاستی مسلك

اتخاذ ایتش ذکالک یتشمه مه سیدر . اوروپاده طاله یرانلره ،  
 مته ریخلره ودها بویوک رجال سیاسییه قارشى تورکیده دایما  
 وسط درجه یی کچمه یی ، وحتی اکثریتی دون بر ذکاده رجال  
 سیاسییه مملکتک مقدراتی اداره یه جرات ایله مشلردر . عثمانیلرک  
 سیاسی و علمی بوتون فلاکتلرینک مسببی ، رجال سیاسییه سنک  
 جهالتیدر .

حتی صوک فلاکتلریمزده بوسینه مزک آجی بر نتیجه سیدر .  
 بالقان شبه جزیره سنک اوفاق حکومتلرنده بیله سیاستی مسلك  
 اتخاذ ایتش ، مملکتک هر درلو احتیاجاتی تدقیق ایلش ،  
 اوروپاده بویولده تدقیقاتده بولونمش ذوات رأس کاره  
 کچدکاری حالده ، تورکیده غزته مترجملرینک ، ترجمه  
 معلملرینک ، هیچ بر مکتب عالیدن نشأت ایتمه مش کیمسه لرک  
 نظارتلره تعیین اولندیغی ، مقدرات ملتک جهلا ائنده قالدیغی  
 کورولمشدر . اوروپانک خارقه آسا سیاسته قارشى ، تورکیه نك  
 مقدراتی ، فرانسه خارجه نظارتنده عادی بر مأمور صفتیله بیله  
 استخدام ایدیله میه جک کیمسه لرک ائنده بولونورسه ، بوملت بویله  
 فلاکتلره دکل ، حتی دها آغیر هزیمتله گرفتار اولور .

عثمانلی رجال سیاسییه سنک بصیرتسزلکی ، سیاستده  
 بهره سزلکی ، بوکونکی فلاکتلریمزک مسیبلرندن بریدر . اویله  
 رجال سیاسییه مز واردرکه ، مملکتلرینک تاریخنندن کلیاً بی خبر  
 اولدقلری کی اوروپا سیاستده قطعاً وقوفلری یوقدر . حتی

بو یولده نشر اولونان فرانسزجه آثاری بیله مطالعهیه تنزل ایتمزلر.  
ایتمش اولسه لر دی، ایتالیانک بحر سفید سیاستنی تعقیب ایدر،  
ایتالیا سیاستک طرابلس غرب اوزرنده کی آمال وافکارینی  
آکلار، ایتالیا حربی کمال فعالیتله حاضر لاندینی ائنده مملکتی  
ایتالیانک تعرضلرینه غافلانه معروض بر اقامازلردی. بو ذواتده  
جزئی وقوف و بصیرت اولسه ایدی، آرن اوودلق عصیان آتشرلیله  
قورولدیغی صرهدده، بو عصیان آتشرینی مجلس مبعوثانده،  
مبعوثان کرامک کوزلری اوکنده بر (نور) شککنده تصویر  
ایتمک ایسته مزلردی.

بو کونکی فلاکتلریمز، بو مدهش انهرامی حاضر لایان رجال  
سیاسیه مزک خطاسنی آرتق بزه صراحت آکلادی. فقط امین  
اولمالی یزکه، بزده بو دماغ، بو حالت فکریه، بو جهالت،  
منفعت شخصیه بو انهمک، اک جاهل اولانلره بیله صرف  
شخصی منفعتلریمز ایچون بوتبصیص حسلری دوام ایتدکجه،  
استانبولکده دشمن استیلاسی آتنده قاله جفنه هیچ شبهه  
ایتملم.

بو کون پک ای بیلملی یزکه، بز یا لکزه نه قوتله، نه دهه عسکر لکله  
بو وطنی قورتارامیز. بر ملت ایچون اردو، وطنک یکانه  
محافظیدر. فقط اردونک ظفر یوللری اوزرنده سوقی عرفان ایله  
حاضر لاندکجه، ملت کندی سبب موجودیتنی ودها طوغروسی

نه ايجون حرب ايتديکني بيلمديکجه ، حربده مظفريت امکان  
خارجنده در .

عثمانلير ، اردو ايله قوتلريني ، سياستله ذکالريني انکشاف  
ايتيرمليدرلر . فقط يالکيز اردوئي وجوده کتيرمک کفايت  
ايتمز . بوکون اک زياده محتاج اولديغمز ، سياست و معرفتدر .  
اوروپا سياستنگ ماهرانه ائتريقه لرندن يقاضري قورتارمق ايجون  
عثمانليرده ده رجال سياسيه يتشمه ليدر . سياست ، بزم آکلاديغمز  
کبي ، صرف اداره مصلحتدن عبارت دکلدز . ابي بر سياسي  
اولا بيلمک ايجون ملتک تاريخ سياسيينه واقف اولمق ، شرق  
مسئله سنک کافه عنعناتي تدقيق ايتمک ، معاهداتمزي ، اسلاف رجال  
سياسيه مزک حياتي تتبع ايتمک ، ماضي بي بوتون عنعناتيله کوز  
اوکنه کتيرمک ، آندن سوکرا ملتک مقدراتي اداره ايجون  
رأس کاره کچمک ايجاب ايدر . بو اوصافي حائر اولمادن ، بومهم  
وظائف درعهده ايتمک زواللي وطنک ، بدبخت خلقمزک  
مقدراتي ايله استهزا ايله مکدر .

بوصوگ فلاکتلر آرتق بزم ايجون موجب عبرت اولور ،  
ظن ايده رز .





## فهرست مندرجات

صفحه	
۳	تورکيا ناصل پايلاشيلدى ؟
۶	۱ . نچون بر شرق مسئلهسى موجود
۱۴	۲ . تورکيه نك تهديد ايدلمهسى
۱۷	۳ . روملرک استخلاصى و صربلرک مختارىتى
۲۲	۴ . اوروپانك تورکيه يى حمايه ايتمىسى
۲۹	۵ . بر قونغرە نك مقرر اتنك نه قيمتى وارمش ؟
۳۳	۶ . روسيه نك انتقام تشبثى
۴۱	۷ . بر قونغرە مقرر اتنك اهميتى
۴۷	۸ . ۱۹۱۲ - ۱۳ بجرانى
۵۹	خاتمه



## قيمتى ( ۵۰ ) پارەدر

کتابخانە انتباهك نشر اولونان عددلرى :

نومرو	پارە	غروش	موضوع
۱	۲۰	۰	زواللى ملت
۲		۱	ملتك خطالرى
۳	۱۰	۱	ملتك قصورلرى
۴		۱	اسباب هزيمت وفلا كتمز
۵		۲	معارفمىز و ثروت علميه مىز
۶	۱۰	۱	حرام يىغىلك
۷	۲۰	۳	تعليم و تربيه ده انقلاب
۸	۳۰	۱	جان چكيشن توركىيا
۹		۲	بالقان حربنده نه دن منهزم اولدق
۱۰		۳	آناطوليناك استقبالى
۱۱	۱۰	۱	توركىيا ناصل پايلاشيلدى ؟
۱۲	۲۰	۲	عسكىرى مغلوبىتلر مىزك اسبابى

کتابخانە انتباهك نشر اولنه جق عددلرى :

توركىيا اويان .  
 آوروپا يلاشمق  
 شرقده سياحت